




RECA
OV.
ONE







BIBLIOTECA
SEMINARIO V.
PORDENONE

B

B

BRA

XI-1

M. A N T O N I I
B R A G A D E N I.
I O. P A V L L I F I L I I.
P A T R I C I I V E N E T I.

D E H O M I N I S F E L I C I T A T E

Libri Sex:

V E L

D E R E R V M V A R I E T A T E L I B. I I.



D E R E P V B L I C A, E T L E G I B V S L I B. I V.

A D S E R E N I S S I M V M P R I N C I P E M,

A M P L I S S I M V M Q; S E N A T V M

V E N E T V M.



V E N E T I I S, Apud Nicolaum Mißerinum.
C I D I D X C I V.



M. ANTONII
BRAGADENI
IO. PAVLLI FILII
PATRICII VENETI
DE HOMINIS FELICITATE

Libri Sex:

DE RERVM VARIETATE LIB. I.
DE RERVM VARIETATE LIB. II.
DE RERVM VARIETATE LIB. III.
DE RERVM VARIETATE LIB. IV.
DE RERVM VARIETATE LIB. V.
DE RERVM VARIETATE LIB. VI.



VENETIIS, apud Nicolaum Maffettum.
MDCLXXIV.

SERENISSIMO
P R I N C I P I
AMPLISSIMOQ; SENATVI
V E N E T O

M. ANTONIVS BRAGADENVVS.



OMINEM, SERENISSIME
PRINCEPS PATRESQ;
AMPLISS. non sibi soli, sed
primum immortalī DEO, deinde
partim suis, partim patriæ natum
esse, ita sapientissimi quiq; philo-
sophi testantur; vt præcipuam
ortus eius partem, post Deum, patriam sibi vendi-
care vna & mente & voce consentiant. Parentes enim
id solum efficiunt, vt huiusce vitæ lucem aspiciamus,
patria vero, vt eandem omnibus commodis affluen-
tem traducamus; illi nos gignunt, hæc genitos susci-
pit, & quasi communis mater alit, instituit, tuetur, or-
nat, & ad felicitatem vsq; perducit: vt merito in pa-
triam omnia vitæ studia collocare, eiq; actiones, cogi-
tationes, nostra deniq; omnia perpetuo consecrare de-
beamus. Quapropter ego florentissimam hanc Remp.,
quam iucundissimam mihi patriam singulari Dei mu-
nere concessam esse gaudeo, cum alteram quasi pa-

rentem, iam inde a primis annis, qua debui maxima pietate complexus sum, atq; ad eius cōmodum omnia mea consilia actionesque rerulerim; iamdiu maxime optaui meam in ipsam caritatem certo aliquo argumento patefacere. Itaque, vt Deo primum, mox patriæ, deniq; parentibus, mihiq; ipsi aliqua ratione satisfacerem; scientiarum optimarumque artium studijs operam dedi, ac prius quidem ad eam philosophiæ partem, quæ rerum contemplatione continetur, postea vero ad alteram in actione positam, ad philosophiam, inquam, de moribus, & ad ciuilem legalemq; facultatem cognoscendam, animum studiumq; applicui: atq; aliquot annis in earum cognitione consumptis, varia pronūciata ex vtraq; philosophia, & vniuersa pene encyclopædia desumpta, sex libris De Hominis felicitate complexus sum: in quorum primo & secundo, de Rerum Varietate, in ceteris, De Rep. & Legibus vsitato magis & quotidiano dicendi genere, quam copioso & ornato disserui: qui libri, cum mihi edēdi sint, & vt moris est, in disputationē publice proponendi: satis opportunam, diuque optatam nactus occasionem meæ, post Deum, patriæ maxime debitæ caritatis significandæ; eos, vti patriæ ciuē amantissimum decet, tibi Serenissime PRINCEPS, vobisq; PATRES Opt. donatos & consecratos, meque simul vestri studiosissimum perpetuo addictum esse volui. Cui enim, aut ad meam erga patriam pietatem testificandam conuenientius; aut rebus ipsis, quæ in hisce libris de philosophia, deq; Rep. & legibus tractantur congruentius; quam vobis sapientissimis eiusdem patriæ moderato-

ribus consecrare possum? ita primum singularis in patriam amoris mei testimonium extabit apud omnes: tum hæc lucubrationes ex vniuersa philosophia depromptæ, vos optimarum artium scientia, & rerum gerendarum prudentia præstantes, noctæ patronos atq; tutores, sapientiæ ac prudentiæ vestræ splendore illustrabuntur: denique nostri libri de Rep. & legibus, qui Remp. & leges rudibus duntaxat lineamentis adumbrant; ei Reip. dicati in lucem prodibunt, quæ optimis ac saluberrimis legibus temperata, optime institutæ Reip. forma & exemplum, sapientum omnium sententia iudicatur. Hos itaque ingenij mei fœtus multis editos laboribus atq; vigilijs in scientiarum studijs patriæ potissimum causâ susceptis, tibi Serenissime PRINCEPS, vobisq; ampliss. PATRES multis de causis debitos, vltro a me delatos, hilari fronte & læto, quo dantur animo, vt accipiat, vos etiam atq; etiam rogo; & munusculum hoc magnitudini meritorum, ac dignitati vestræ longe impar, ex animo potius, quàm ex re ipsa spectantes, vestra benignitate ita foueatis, vt perpetuum hoc vigeat pietatis meæ singularis in patriam, & in vos mirifici amoris & obseruantiae monumentum. Valete Serenissime PRINCEPS ac SENATORES ampliss., vosque DEVS Opt. Max. saluos ac felices perpetuo seruet, omniaque vestra consilia ad patriæ salutem dirigat, actionesque fortunet.


Patauij xij. Kal. Maij.

CIO IO XCIV.

M. ANTONII BRAGADENSI

hieroglyphicum emblemata in Encyclopaediam
ex illo gen. i. faciamus hominem ad
imaginem et similitudinem nostram.

SYNOPSIS ENCYCLOPAEDIAE.



Nata Deo tripla, triplum concluditur orbe,
Tergemino similem, quod facit una Deo;
Hac uir cuncta capit, format, mentemq gubernat,
Et regit imperio clarus in orbe uiror:
Dum licet haec animo claudas qui tendis ad astra;
Nam trino similis sic eris ipse Deo.

M. Antonius Bragadenus scribat, et delineabat. Datauij. 1594.

εἰς τὸν τῆς σοφίας ναὸν ἑμβλημα, κατὰ
τὸ, θ, τῷ παρομοιωῶν.

הכמות בנתה ביתה כהב עומד שבב

Κλεινὴ ἀληθείας Δέσποινα, θεοὶ καλίσσι
λύ σοφίν, ἄνδρες φιλοσοφοῦσιν ἀρετῇ;
Τριφεῖς καλαῖς σου μέσας δείματο δῶμα
ἑπταχά δαιδαλθὲν, κίονας ἔπ' ἐπέχον.
Πρώτη ἐκ φράσεων ιδιώματος ἐστίν, ἐν αὐτῇ
πάντα σοιχείων λάμπεται ἀγλαΐα:
Διυτέρη ἐπ' ἀγλασσοῦ ἔχει τὴν βάρβιτον ὕμνοισ
θεῶν, καὶ ῥυθμοῖς θελγομένην μέροσας:
Πολλὰ λόγων τρίτη ἐγκυκλοαμμένα σχήματα δηλοῖ,
τῷ τε γένει ὄντων, τὰς θεσέωντε τόπας:
Κρυψὴ λέξις ἐν ἐστὶ τετάρτη ἀνθεα πειθεῖς
θηρία τῷ μεσῶν, γλωττόκομόντε μελῶν:
Πέμτη ἔχει ἀβάκους καὶ ἀριθμῶν μυρία πολλὰ
ἐκτε ταῖς γραμμαῖς καὶ καθέτοις ἐγρέφει:
Οὐρανὸς ἄσρα φλέγει ἐνὶ ἐβδόμῃ ἥλιος, ἑρμῆς,
μυῖα, ἄρης, παφίη, ζῶστε, πατήρ τε κρόνος.
Ἀλλὰ δόμους λιθίνους κορυφῶνται ἀμφὶ πρὸς σωπὸν
εἰδωλα εἴφανον χερσὶν ἔχοντα τρία;
Ἐν φύσει ἔργων καὶ μυρία σχήματα ζῶων,
παντοδαπῶν ἰδεῶν ποικιλίαν κατέχει:
Τῶν δ' ἑτέρων ἐν χερσὶ βλέπονται τ' ἦθια ἀνδρῶν
ἄσσοι, καὶ βασιλεῖς τῷ πολέωντε νόμοι:
Χουσεφὲρ ἀνὰ σκήπτρῳ πρῶτον ἑστῆσιν ἄλλων
τὸ τρίτον ἄσρα θεῶν ἐρανιῶνας ἔχον.
Νῦν τὸ δεῦμα νέοις μῦθον κήρυξε παρθέναι
ἡ σοφίη τὸ πλεόν τοῖς πρὸς φέρεισι πονοῖ:
Τένεκεν ἄρα νέοι πάνυ πολλὰ πονεῖτε, φέριςτος
καιρὸς, καὶ νεότης μέγχι πάρεσι καλῇ.

ΤΟΝ ΠΑΤΕΡΙΟΥΣ ΔΕ ΜΗΤΡΑ ΤΟΝ ΑΝΤΩΝΙΟΝ
M. ANTONII BRAGADENI

שִׁיר עַל הַחֲכָמוֹת בְּכָל־ל

אֲשֶׁר מִ-	עֵשִׂים	כָּל	בְּחֻמֹּת	פְּלָאִים
בְּרָאִים	וְסוֹד־	כָּל	בְּסִפּוֹר	אֱלֹהִים
מְנִלָּה	לְעִין	כָּל	חֲכָמִים	רְפָאִים
בְּחִידָה	בְּרוֹ	כָּל	נְבוֹנִים	נְנוּחִים
סְתוּמִים	לְלֵב	כָּל	אֲטוּמִים	פְּתָאִים
תְּמָהִים	לְרוֹם	כָּל	תְּבוֹנוֹת	גְּבוּהִים
יֶאֱשֶׁר	שִׁכְר	כָּל	תְּבוּנָה	כִּמְהִים
בְּרַעַת	יְסוֹד	כָּל	בְּנֵי הַ-	אֱלֹהִים

תם

Ἐστὶ τῶ φιλοσόφῳ ὡς ἐν πάντων δύναθαι θεωρεῖν. Ἀριστοτέλ.
ἐν μετὰ τὰ φυσικὰ τὸ γ'. καὶ φ. β.

O T A E N
Γ Λ Υ Κ Υ Τ Ε Ρ Ο Ν,
Η Π Α Ν Ε Ι Δ Ε
Ν Α Ι.

Nemo poterit esse omni laude cumulatus Orator, nisi erit omnium rerum scientiam consecutus. Cic. lib. I. de orat.

M. ANT.

M. ANTONII
BRAGADENI.
PATRICII VENETI.
DE HOMINIS FELICITATE;
V E L
DE RERVM VARIETATE
Liber Primus.

P R Æ F A T I O.



VMMVS ac prepotens DEVS, ab omni aternitate perfecte beatus, cum summam suam felicitatem, cum alijs communicare constituisset: Mundumq; hunc, quem cernimus, suo verbo ex nihilo condidisset: omnia, quæ in terris gignerentur ac fierent, ad vite usum & hominis commoditatem procreavit, eiusq; subiecit imperio; hominem vero sui causa, sibiq; similem effinxit, & ad aternam beatam vitam in Cælo repositam destinavit. Cum itaq; DEVS cetera omnia animantia rationis expertia, prona & humi depressa finxisset; solum hominem rationis participem & dominum omnium rerum esse voluit; eumq; celsum atq; erectum Cæli, quasi pristini domicilii spectatorem, in hoc pulcherrimo rerum varietatis Theatro constituit; ut celestium corporum ordinem, admirabilemq; rerum conditarum varietatem contemplando, ipsum Mundi summum opificem & fabricatorem agnosceret, eiusq; immensam potestatem, sapientiam singularem, incredibilemq; mu-

A nisi.

nificentiam admiratus, cum ex animo atq; vnice amaret & coleret, perfectaq; viuendi ratione quam maxime posset imitaretur: atq; ita homo, dum corporis ergastulo inclusus est, caelestem illam beatitudinem meditaretur & inchoaret; mox eo solutus, in celum euolans, vitam perfecte beatam ac sempiternam ageret. Atq; hoc quidem est vere, non verbo tenus philosophantium studium & perpetua voluntas; & ijs, qui CHRISTI fidei initiati sunt propositus finis, ut scilicet DEVM Opt. Max. agnoscant, cognitum pie venerentur, perfecteque virtuti conuenienter, statuunt perpetuo sibi esse viuendum. Cum autem Dei cognitio & amor atq; ipsa virtus, in duplici animi parte posita sit, in rationis & voluntatis perfectione, ad praestantissimum hunc finem, duplici genere scientiarum, dupliciq; vitae ratione peruenimus: vna in rerum contemplatione sita, quae rationem perficit; altera in actione collocata, quae voluntatem potissimum format. Nam priori vitae ac studiorum genere, cum caelestium ceterarumq; mortalium rerum pulchritudinem contemplamur; tum praecipue DEVM agnoscimus, in eiusq; admirabilis operis cogitatione defixi, diuinam potentiam, sapientiam, bonitatem, ac prouidentiam elicimus. Quis enim tam hebeti tardoq; ingenio esse potest, qui, cum ingentem admirabilemque Mundi machinam conspexerit, summum eius artificem & fabricatorem non agnoscat? quis porro tam stupidus, qui, cum tantum Mundi ornatum, tam multarum rerum firmam perpetuamque vicissitudinem, tantam naturae varietatem intueatur: caelestium corporum pulchritudinem contempletur; Solis, & Lunae, & reliquorum syderum errantium, atq; astrorum omnium fixarum viderit distinctionem, magnitudinem, motus aequabilitatem, progressiones, institutiones, & ordinem sempiternum; non intelligat numen aliquod esse harum maximarum rerum conditorem, moderatorem, perpetuumque conservatorem? Cum autem tot rerum genera, quae in terris gi-
gnuntur, hominum causa parata esse cernimus; cum lucem
qua

qua fruimur; animum, quo uiuimus, & presentem beatam vitam, eternamq; in calo constitutam, intelligimus ab hac praestantissima mente Mundi effectrice, quam DEVM appellamus, nobis impertiri; quis adeo immanis inueniri potest, qui singulari in eum amore non inflammetur? Altera vero vite studiorumq; ratio in actione posita, quae cuiusque, & familiae, ac Reip. institutionē docet; id nobis potissimū praeat, ut singulis nostris actionibus Deum nostri, omniumq; rerum parentem munificentissimum contemplari, summa caritate prosequamur, eiusq; causa ceteros pariter ac nos metipsos amemus: ea enim cuiusq; & vniuersorum hominum mores, actiones, cogitationesq; dirigendo efficit, ut debitum cultum Deo rite exhibeamus, deinde honeste uiuamus, postremo suū unicuiq; iuris equabilitate tribuamus; atq; ita cū nobismetipsis, tum parentibus & patriae utiles, & viri boni simpliciter simus. Ex quo efficitur, eos tum demum beatos habendos esse, qui rerum praestantissimarum contemplationem cum actionibus consentaneis perfectae virtuti cōiunxerint. Quoniam igitur hominis, qui ratione ducitur & uiuit, praecipua cogitatio in eo sita esse debet, ut finem & rerum agendarum ultimum cognitum habeat planeq; perspectum; constatq; felicitatem nostram in praepotētis Dei, rerumq; ab eo conditarum cognitione, & in actione uirtuti optime consentanea in uita perfecta esse collocatam; propterea, ut ad hoc praestantissimum hominis bonum pro facultate peruenire possem, ex duplici philosophia in cogitatione & actione posita, libros duos de rerum uarietate deprompsi, quibus diuinæ naturae, & rerum fere omnium contemplationem per summa capita breuiter perstrinxi, nec non libros quattuor de Rep. & legibus, qui in bene constituta Rep. rationem tradunt perficiendarum nostrarum omniū actionū, quibus Deo primū debitus cultus adhibetur; deinde alij, uel in una familia, uel in una Vrbe cōgregati, apte ad summā felicitatē bonis moribus instituuntur, ad uirtutem informantur, & optimis legibus gubernantur.

L I B E R
EX SACRA THEOLOGIA
Scolastica. Cap. I.

I



- QUONIAM* hominis felicitas primum in contemplatione, ac præpotentis Dei cognitione sita est; & rerum varietatis ab Immortali Deo, tamquam ex primo auctore principia ducuntur: merito ab ipso Deo felicitatis cognoscenda varietatisq; contemplandæ sunt nobis capienda primordia; postea dicendum quæ sit diuina natura, quæ eius attributa, quæ providentia, quid summa Trinitas, & qua ratione Deus sit hominis principium, finis, & recuperator.
- 2 Itaque DEVM esse, non modo fide ac religione credimus; sed etiam naturæ vi possumus rationibus physicis probare ac demonstrare.
- 3 Est autem Deus, mens sine corpore, & rerum omnium maxime pura ac simplex.
- 4 Idemque unus est, infinitus, æternus, perfectissimus, beatus, ac immortalis; & singula, quæ ab eo condita sunt, earumque perfectiones omnes admirabili, præstantissimæque ratione continet.
- 5 Præterea Deus est optimus, immo vero suapte natura est summum bonum, ut nihil in omni Mundo melius sit, nec excogitari quidem possit.
- 6 Ceterum, quamvis Deus ob summam naturæ infinitatem sit ubiq; locorum & gentium, tamen nulla regione, nullisque Cæli, aut rerum vniuersitatis finibus, quasi æquali, certoque loco definitur, aut circumscribitur.
- 7 Sed omnibus, singulisq; rebus creatis intime coniunctus inest sua natura, potestate, atque præsentia.
- 8 Propterea Mundus, omnesq; Mundi partes omni tempore diuino consilio, diuinaq; providentia administrantur.
- 9 Nec modo Deus vniuersæ Mundi, rerumque humanarum
pro-

procuracionem habet; sed priuatim etiam cum omnibus inuuantibus causis absq; earum efficientia impeditiōe, ad singula efficienda nulla re alia interiecta cōspirat atq; cōcurrit.

10 Tamen diuerso modo prouidet homini, atq; ceteris rebus. Nam, cum homo ad finem supra naturā ordinem diuinā prouidentia dirigatur; Deus ut admirabilem suam misericordiam, institutiāq; patefaceret, nullo merito nostro, ex hominibus quosdam ab omni aeternitate ad aeternam gloriam delegit ac destinauit; quosdam autem ob eorum nefaria scelera reprobauit.

11 Qui quidem omnes certo ac immutabili numero, diuināq; scientia comprehenduntur.

12 Neminem tamen Deus reprobauit ante praeuissam culpā.

13 Atque haec de unitate diuinā naturae, quae ita una est ac simplex, ut plures personas non excludat.

14 Est enim in Deo intima sui communicatio, & absque ulla sui immutatione trium personarum Patris, Filij, et Sacri Spiritus multiplicatio atque distinctio.

15 Nam aeterni Patris, qui a nullo natus est, quaedam est fecunditas atque communicatio, quae uera est, & propria, unaque tantum generatio.

16 Qui a Patre existit, uere est Filius, isque unigenitus, nullā uī; sed naturaliter & necessario a patre ex sua naturā, & rerum omnium cognitione genitus.

17 Pater uero, & Filius se mutuo infinite diligentes, spirant ambo Sacrum Spiritum, eiusdem prorsum naturae & aequalitatis.

18 Spiritus Sanctus, non genitus est, non filius; sed a Patre & Filio, uno ipsius principio, unaq; spiratione mirabiliter emanat.

19 Sunt autē diuinarū personarū aliquae uerae relationes; quae perfectionē explicāt, & proprietatē, ac distinctionē adiungūt.

20 Nam, tametsi diuinarum personarum relationes, & diuina natura re ipsa non differant: tamen non sunt idem prorsum,

sum, quod diuina natura.

- 21 *Præterea, sunt quedam notiones ac proprietates, quibus etiam diuina persona inter se distinguuntur.*
- 22 *Deus vero Opt. Max. non modo intra se; sed etiam cum alijs, & cum homine præsertim bonitatem suam immensam communicauit, cum Mundum & omnia, quæ eius ambitu continentur hominis causa fabricatus est, ipsum vero ob sui gloriam procreauit.*
- 23 *Ex quo Deus hominis non modo principium est, sed etiam ultimus finis.*
- 24 *Absoluta enim beatitudo nostra, nullo modo in hisce rebus creatis atque caducis consistit, sed in Dei cognitione;*
- 25 *Quod, etiam si natura duce necessario probari potest:*
- 26 *Tamen, nisi diuinitus patefactum esset, felicitatem nostram sitam esse in clara Dei ac sanctissime Trinitatis inspectione, & amore, ut Christiana fides atque religio docet; humana mens natura tantum lumine illustrata, nullo studio ad tam admirabilem cognitionem aspirare potuisset.*
- 27 *Hæc beatitudo quoniam in immortalis Dei perspicua inspectione & amore posita est; ea fruimur duplici animi functione, id est intelligentiæ, & voluntatis.*
- 28 *Verumtamen, primum atque præcipue ea in amore erga Deum consistit: postea in eiusdem amati obtutu & cognitione.*
- 29 *Hoc autem diuino bono, modo fruuntur singule beatorum mentes, quæ per se diuinam naturam atque personas intuentur, & attributa diuina intelligunt, quæ fide certa ac persuasa habuerunt, & quæ vi naturæ cognoscuntur; necnon ea, quæ ad rerum vniuersitatem pertinent.*
- 30 *Nemo tamen eorum, qui in Cælo beatam vitam degit, in diuino verbo videt omnia, quæ Deus comprehendit, nec vniuersa, quæ a Deo creari possunt; sed vniuerse duntaxat cognoscit omnium rerum naturam, species, & proprietates.*
- 31 *Et quo ceteris beatiores sunt, eo plura & clarius vident:*
- 32 *Beatitudo enim est inæqualis non modo ex Dei videndi*
cla-

*clariori vel obscuriori ratione; sed ex rei quoque obiecta, id est Dei, & diuinorum attributorum magis minusue cum-
lata cognitione.*

- 33 *Nos vero non possumus per nos ipsos, nostrisq; viribus di-
uinam naturam intueri, nisi gloria diuino lumine illustrati
ad eam perducamur.*
- 34 *Itaq; iusti atque integri eorum animi, qui ante CHRI-
STI mortē diem suum obijerunt, antequam CHRISTVS
resurgeret, nec Dei conspectum subire, nec in celestem pa-
triam ingredi potuerunt.*
- 35 *Modo tamen iustorum hominum anima, ab hoc corporis
vinculo soluta, & sacris ab omni noxa liberata, vel in igne
purgante expiata, statim in Cælum commigrant, in sancto-
rumq; consortium admittuntur.*
- 36 *Impiorum vero anima, ubi e corpore excefferint, absque
ulla cunctatione a iustissimo iudice eterno igni adiudicate,
debitam luunt in inferno carcere penam suorum scelerum.*
- 37 *Quoniam vero ob peccatum origine contractum, ceteraq;
ab hominibus perpetrata scelera, admodum vitiosa ac de-
prauata erat humana natura; Deus ut eam restitueret &
præclusam aditum ad beatitudinem patefaceret, humanam
carnem assumpsit.*
- 38 *Quod, tametsi non fuit omnino necessarium ad hominis
salutem: tamen omnino consentaneum fuit, Deum se se crea-
tis rebus communicare humana carnis assumptione.*
- 39 *Ac longe congruentius hominis, quam Angelorum natu-
ram induit; ut natura, quæ peccauerat, ipsa satisfaceret, ac
recuperaretur.*
- 40 *His ergo vulneribus natura humana, CHRISTVS
Sacramenta tamquam salutarem medicinam adhibuit; eaq;
ad genus humanum reparandum necessario instituit.*
- 41 *Sacramentum autem non modo est rei sacræ signum; sed
etiam diuinam gratiam hominē iustum efficientem confert.*
- 42 *Semperq; signū est rei sensibus subiectæ, quæ diuina gratie
nostræq;*

noſtræque ſanctitatis ſignificanda & efficienda vim continet.

- 43 *Nec ſolum vnâ aliquam rem, ſed plures ex diuina inſtitutione ſignificat. Nam unumquodq; Sacramentum, primum diuinam gratiam nos ſanctos & iuſtos reddentem indicat, ac demonſtrat: deinde CHRISTI Sacramentorum & noſtræ ſanctitatis auctoris cruciatuum & mortis memoriam affert: poſtremo celeſtem beatam uitam, & gloriam ſempiternam prænunciat.*
- 44 *Singula Sacramenta rebus & uerbis conficiuntur, quorum alterum materia, alterum formæ uim atque rationem obtinet.*
- 45 *Semperq; in Sacramentis nouæ legis certis rebus a Chriſto inſtitutis, ac potiffimum præſcripta uerborum forma uti oportet.*
- 46 *Effectus Sacramentorum, duo præcipue ſunt, gratia & character.*
- 47 *Nam Sacramentum & diuinam gratiam confert, quæ hominem iuſtum ſanctumque reddit; & ueluti quoddam inſigne animæ imprimit, quod deleri nunquam poteſt.*
- 48 *Quamuis enim Sacramenta rebus ſenſibus perceptis conficiantur, quæ ſuapte natura animum attingere non poſſunt: tamen admirabili præpot. Dei uirtute, tantam uim habent, ut ad hominum intimos ſenſus, & animam uſque penetrent gratiam conferendo, & character imprimendo:*
- 49 *Sed illud ſingulis Sacramentis commune eſt; hoc uero triũ ſolummodo proprium, baptiſmi, confirmationis, & ſacri ordinis.*
- 50 *Ex quo facile intelligitur, nouæ legis Sacramenta ueteris legis Sacramentis præſtantiorem uim obtinere.*

מִקְבֵּלָה

ET EX MYSTICA THEOLOGIA.

Cap. I I.

- 1 **D**ECIM קְבִירֹת, sunt regule diuinitatis, quibus Deus bonitatem suam immensam cum alijs communicauit, perpetuoq; communicat.
- 2 Deus vero creauit Mundum tribus libris, בְּסֵפֶר וּסְפָר וּסְפֹר id est, in libro, numero, & locutione.
- 3 Nomen יֵשׁוּעַ, ex principijs הַקְבֵּלָה, notat Deum, Dei Filium, Patris sapientiam, secundam Trinitatis personam, opera Spiritus Sancti humana carne indutam, Mundi conditorem munificentissimum, eiusdemque Seruatorem.
- 4 Sanctuarij porta, quam Ezechiel clausam aspexit, & la-^{Exo. 44.}
pis e monte absque manuum, & hominis opera abscisus; qui ^{Dani. 2.}
creuit in montem adeo magnum, ut vniversum Orbem terrarum impleat; conceptionis & Natiuitatis IESV CHRISTI præuia figura & oraculum extitit.
- 5 Cum autē Deus manā patribus in deserto e Cælo demisit, ^{Exo. 16.}
& Melchisedech panem ac vinum Abramo obtulit; typus fuit ^{Gen. 14.}
& prægressa figura Sanctissimæ Eucharistiæ.

EX THEOLOGIA ZOROASTREA,

Trismegistica, Orphica, Platonica, & Sybilarum Oraculis.

Cap. III.

- 1 **V**M Zoroaster, humana totius sapientiæ pater, in suis oraculis cecinit, Patrem proprium ignem non clausisse in potentia sua mentali, & esse omnia vno ab igne progenita; significauit diuinitatem a Deo Patre primum intra suū profundum in mentem primam, & secundam diffusam esse;

B

deinde



deinde extra suum profundum ceteris mentibus, animis, & omnibus rerum gradibus aliquo modo tributam & communicatam; Mundumq; vniuersum a Deo conditum esse.

2 Et sapientissime ac diuine ait Trismegistus, Deum ob hoc ipsum omnia fecisse, ut per omnia eum cernas, hoc bonum ipsius Dei est, hoc eius virtus, ut per omnia appareat.

3 Cum autem Orpheus tres vocat rerum conditores, *Ὀυραν, Οὐρανόν, καὶ Κρόνον*, intelligit & innuit Patrē, Filium, & Sacrum Spiritum simul conspirasse ad Mundum producendum:

4 Tamen principium vnum est totum quod est, ut præclare inquit diuinus Plato, quod est extra omnia, & in omnibus, omniaq; ex illo, per illud, & ad illud sunt.

5 Erythraea Sybilla in *ἀποσιχ* illo vaticinij de extremo in terris iudicio *Ἰν οὐδὲς, χρεῖσός, θεῶς, ἴψος σωτήρ, σωπός* diuino afflatu Christi aduentum & mortem uaticinata est.

EX METAPHYSICA.

Cap. IV.

1 **M**ETAPHYSICA, est rerum vera scientia ceterarum omnium præstantissima; cuius subiecta materia, quam tractat, est res, vel id quod est, quatenus est.

2 Eius autem quod est affectiones & proprietates, tres numero sunt, Vnum, Verum, Bonum.

3 Vnum, nihil adiungit ei quod est; sed proprie negat diuiduum esse simulq; ipsum significat, & cum eo est idem re ipsa:

4 Verum dicitur, cum eiusmodi res est, cuiusmodi suapte natura esse debet:

5 Bonum autem, modum quendam rei cuiusq; constitutioni congruentem declarat.

6 Diuiditur id quod est in decem summa genera seu categorias, substantiam, quantitatem, relationem, qualitatem, actionem, perpeffionem, ubi, quando, situm, & integumentū.

Que

- 7 *Quæ omnia duplici discrimine in duas supremas classes facile distinguuntur, in substantiam, quæ primam, & accidens, quod ceteras novem complectitur categorias.*
- 8 *His, id quod est non censetur commune genus una & æqualitatione, sed ab uno: nam primum dicitur de substantia, postea de accidente.*
- 9 *Substantia res est, quæ per se constat, omnibusq; subiicitur accidentibus, quibus ipsa prior est natura seu definitione, cognitione, & tempore.*
- 10 *Accidentis autem propria & absoluta natura, non est semper alteri inherere; sed qua alteri accidit.*

EX NATVRALI PHILOSOPHIA.

Cap. V.

I



VE M A D M O D V M summam atque admirabilem immortalis Dei diuinarumq; rerum pulchritudinem ac varietatem in Sacra Theologia cognitione, mente atque cogitatione contemplamur; ita dum ad pulcherrimum huius Mundi Theatrum conspiciendum descendimus, insignem & varium fluxarum celestiumque rerum ornatum diuinam pulchritudinem referentem in naturæ inuestigatione sensibus percipimus & potissimum oculis intuemur.

- 2 *Physica disciplina, est inspectrix scientia ac philosophiæ pars, quæ corpus naturale, seu Mundum corporeum, qua interno motus naturalis principio prædeditum est, tamquam subiectam materiam explicat.*
- 3 *Harum autem rerum natura constantium principia, quædam interna numerantur, quædam externa: interna omnino tria sunt, materia, forma, & huic opposita priuatio.*
- 4 *Quorum duo tantum priora, cum sint ipsa rerum natura constantium essentia, propriæ naturæ nomen ac vim habent.*

- 5 *Natura vero, nihil aliud est, quam intimum principium & caussa motus & quietis eius, in quo est primo per se, & non per aliud.*
- 6 *Externa principia, sunt finis & efficiens, quæ si cum internis duobus materia & forma coniugantur; quattuor existant genera caussarum, materia, forma, finis, & efficiens.*
- 7 *Communes affectiones corporis cuiusque, quod natura præditum est, sunt motus, & quies, continuum, infinitum, locus, tempus, & inane.*
- 8 *Motus, est mouentis & mobilis, quæ moueri potest, per se-ctio seu endelechia,*
- 9 *Cuius unitas & propria natura sumitur a termino ad quem tendit.*
- 10 *Cum autem in omni motu sit actio atque perpe-ctio, actio inest per se in patiente tamquam in subiecto, in agente vero per aliud alienaque vi.*
- 11 *Motus multiplex est, nam alius est naturalis, ut ortus, interitus, accretio, diminutio, immutatio, & motus grauium & leuium; alius violentus, ut agitatio eorum, quæ vi in subli-me eiiciuntur; alius animalis, ut ille, qui cunctis animantibus conuenit.*
- 12 *Grauia & leuia corpora a facultate essentiali ad motum rediguntur a generante, proxime & per se mouentur a sua forma, per aliud vero ab eo, quod remouet impedimentum.*
- 13 *Proiecta, motu cientur ab aere intermedio succedente tamquam ab efficiente.*
- 14 *In animantibus autem, forma atque materia est principium, quo ipsa per se mouent & mouentur; totum vero, est id, quod mouet & mouetur.*
- 15 *Continuum, quod magnitudinem & quantitatem corporis naturalis complectitur, non componitur simpliciter ex indi-uiduis corpusculis, nec ex omnino indiuiduis; sed ex parti-bus continuis, & quæ diuidi possunt.*
- 16 *Infinitum, re vera nihil esse potest; cum omnia simplicia*
&

& concreta corpora finitam magnitudinem & vim obtineant.


- 17 Locus, proprie nihil aliud est, quam superficies corporis ambientis.
- 18 Tempus, est mensura seu numerus motus per prius & posterius.
- 19 Inane autem & vacuum, nihil est in rerum natura, nec vi naturæ esse potest.
- 20 Corpora naturalia iam constituta explicatisq; affectionibus prædita, alia sunt æterna, ut calum, alia mutabilia, ut cetera omnia.
- 21 Calum, est corpus naturale simplex, materie, formæque expers:
- 22 Neque enim componitur ex materia horum inferiorum;
- 23 Neque intelligentia, est forma, quæ calum informet; sed suo orbi assistit.
- 24 Ex quo efficitur, calum & intelligentias simpliciter esse immortales.
- 25 Verumtamen, calum vim suam exercet in hæc inferiora corpora motu & lumine, quorum vi tantam in natura rerum pulchritudinem, varietatem, ac perpetuam vicissitudinem cernimus.
- 26 Corpora physica per se ortui atque interitui obnoxia, alia simplicia sunt inter corpora, ut quattuor elementa: alia concreta, ut omnia, quæ ex elementis, & ex eorum qualitatibus permiscentur.
- 27 Elementa, quæ sunt prima ac simplicia corpora ex materia & forma orta, sunt quattuor tantum, ignis, aer, aqua, & terra.
- 28 Ignis, cum leuissimus sit, supremam atque ætheream obtinet regionem, suoq; globo semper in orbem fertur, quamvis suapte natura sursum & recta moveri deberet.
- 29 Huiusmodi autem motus in orbem, oritur a Cali conversione & motu, ab eoq; perpetuo conservatur.

- 30 *Igni proximum locum possidet aer, qui in tres regiones diuiditur in supremam, infimam, & mediam.*
- 31 *Quæ quidē differūt inter se magnitudine, & qualitatibus.*
- 32 *His succedit aqua, quæ aeri subijcitur, & terra superior, ac longe maior existit.*
- 33 *Postremo loco est terra ipsa, quæ immota manens, sui gravitate ad centrum deprimitur.*
- 34 *Horum quattuor elementorum, quattuor sunt primæ qualitates, calor, frigus, humor, & siccitas; quarum altera alteri primum congruit elemento.*
- 35 *Terra enim est omnium primum sicca, aqua primum frigida, aer primum humidus, ignis primum calidus.*
- 36 *Concreta corpora naturalia, sunt ea omnia, quæ ex elementorum permistione exoriuntur; quæ, cum mortalia sint, perpetua vicissitudine modo gignuntur, modo intereunt, modo augētur, modo imminuuntur, modo deniq; immutātur.*
- 37 *Permistio est eorum, quæ inter se temperari possunt, commutatorum unio; quæ a misti generatione re ipsa non differt, sed ratione tantum.*
- 38 *Recens autem essentia generatio, non fit ex nihilo; sed ex antegressa subiecta materia, ex qua fiunt quattuor prima simplicia corpora appellata elementa; quæ Mundum mortalem & concreta omnia corpora suarum qualitatum atq; formarum temperatione quadam constituunt. Non enim in concreto, manent integræ eorum qualitates & formæ; sed temperata atq; remissa: tamen ex earum temperatione & mediocritate, mistum ad pondus æquale exoriri, mente & cogitatione potius concipitur, quam vere existit.*
- 39 *Cum autem res naturales intereunt, non dissoluuntur usque in primam materiam; sed manere possunt accidentia quedam communia genito, & interempto.*
- 40 *Corpus naturale, quod vita præditum est, plantas, stirpes animantes, animalia rationis expertia, & hominem continet.*

- 41 *Partes, quibus constant omnia viuientia corpora, sunt materia et forma, materia quattuor sunt precipui gradus, prima materia, quattuor elementa, mista similium partium, & membra; forma vero est anima, quae est perfectio corporis, omniumque eius functionum principium.*
- 42 *Vnde optime definitur, prima corporis naturalis, quod viuendi facultatem habet, perfectio siue endelechia.*
- 43 *Ea, quia principium est, quo viuimus, sentimus, mouemur, atq; intelligimus, diuiditur in nutrientem, sentientem, & rationalem:*
- 44 *Mouendi enim facultas, aliud tantum animatorum, non item animae genus constituit.*
- 45 *Altricis animae tria sunt omnino distincta officia, corpus alere, augere, & aliud sibi simile procreare;*
- 46 *Quod inter cetera munera animae vegetantis opus praestantissimum est, & praecipue a natura ingeneratum; ut sua cuiusque species propagatione, perpetuaeque successionis conseruetur.*
- 47 *Sentiens animae facultas, qua animal percipit aliquo sensu ea, quae extra se posita sunt, ipsum in eminentiorem sublimioremq; gradum corporis atq; materiae constituit.*
- 48 *Sensus sunt duplicis generis, alij externi, qui sunt numero quinque, tactus, gustus, odoratus, auditus, & aspectus; alij interni, qui tres sunt, sensus communis, phantasia, & memoria.*
- 49 *Anima autem rationis particeps, quae est hominis forma, nullo modo diuidua est, nec ullam certam sedem obtinet; sed tota est in toto corpore, & tota in qualibet parte.*
- 50 *Eademque in singulis hominibus, sicuti sentiens in ceteris omnibus animantibus, unica est & singularis, multis praedita facultatibus aliarum imperfectiorum animarum.*


EX HISTORIA STIRPIVM.

Cap. VI.

- 1  *TIRPS*, cuius tractatio postremum locum obtinet in naturali philosophia, est corpus mixtum anima vigente preditum, sine sensu, quod cali ac terra vi, radice, vel auulsione, seminūq; natura solo nascitur, alitur, & augetur.
- 2 *Stirpes autem a natura datae sunt, ut animantibus alimentum, valetudinem, & voluptatem suppeditent.*
- 3 *Omnino tria sunt genera stirpiū, arbor, fructex, et herba.*
- 4 *Quarum diuersae vires ac facultates a medicis agnoscuntur vel primarum qualitatum caloris, frigoris, humoris, & siccitatis proportionem, & gradibus; vel secundarum qualitatum & sensuum auxilio, ut sapore, odore, colore, atq; efficiētia.*
- 5 *Zoodoura seu stirpes animantes, cum nec anima tantummodo, ut ceterae stirpes ac plantae, nec sentiente cum se semouendi facultate, ut animalia; sed anima sentiente motus ex parte constituentur: merito sunt cuiusdam intermediae naturae inter stirpes & bruta animantia.*

EX MAGIA NATVRALI.

Cap. VII.


- 1  *MAGIA* naturalis, est secretior natura philosophia, & fructus quidam, vel in actione posita physiologiae pars.
- 2 *Quae per se utilis est, & iure permissa.*
- 3 *Eius vero miracula & admirabiles effectus, qui rerum naturam & hominum facultatem superare videntur, sunt naturalia efficientia separata, patientibus sapienter applicando, & congruenter connectendo.*
- 4 *Est enim quaedam tum animantium, tum ceterarum naturalium*

ralium rerum sympathia & antipathia, quibus admirabili & abdita ratione, quaedam se se vicissim amplectuntur, & prosequuntur; quaedam refugiunt atque expellunt.

- 5 Ex Magia naturali tres praeclara artes extiterunt Medicina, Chymica, & Agricultura, quae naturali scientia subiunguntur ab eaq; principia mutuuntur.

E X M E D I C I N A.

Cap. VIII.

1  **M**EDICINA, quae dicitur naturae instrumentum, est ars actionis, & ex earum artium serie, quae cōiecturis nituntur ad fines suos cōsequēdos.

2 Ei subiecta materia, est humanum corpus qua sanari potest: finis vero est sanare: officium apte curare ad sanandum: valetudinis autem conseruande vel restituendae causa Medicus utitur indicatione, experientia, & collatione seu comparatione.

3 Sanitas seu valetudo, est naturae consentanea & proba humani corporis constitutio; qua corpus perfecte suis muneribus fungitur.

4 Huic contrarius morbus, est affectus praeter naturam humano corpori insidens, a quo statim laesae actiones existunt.

5 Sanitas autem primū posita est in proba similium partium permixtione, quae temperies nuncupatur: deinde in dissimilium partium concinnitate, quae corporis conformatio dicitur: postremo in utrarumq; partium tam similium, quam dissimilium cōmuni & optima constitutione, quae vocatur cōtinuitas.

6 Contraria est morbi ratio, quoniam in vitij contrarijs, ut in intemperie, mala corporis conformatione, & soluta continuitate cernitur.

7 Intemperies, est morbus similium partium praecipue a causa immutante effectus, a quo lesio functionum exoritur.

8 Mala corporis compositio seu conformatio, morbus est dissimilium


similium partium, qui in corporis figura, & membrorum concinnitate vitiata cernitur.

9 *Soluta continuïtas, est communis similium ac dissimilium partium morbus & depravatio.*

10 *Morbum autem non modo functionum lesio, sed multa alia consequuntur; quæ communi nomine symptomata nuncupantur; symptoma vero, est constitutio præter naturam, vel omnis affectio, quæ morbum comitatur.*

EX CHYMICA, ET AGRICVLTURA.

Cap. IX.

1  *HYMICA, est ars, quæ præcipue ex sulphuris & vini argenti mistione, meliora ex materiâ puriore sceligere vult, & deteriora ex impuriore.*

2 *Sicuti enim vis luminis celestis sulphur & argentum vinum fouet, vertitq; in varia metalla; ita Chymici naturam imitantes, calorem & frigus sulphuri & argento vino applicant, ut aliud metallum colligant.*

3 *In Agricultura vero, duo considerantur ager, & fruges.*

4 *In agro tria potissimum spectantur, primum enim ager eligendus est, eiusq; natura & loci qualitas probe noscenda est: deinde ager colendus est omni industria: postremo in semine facienda, serendo &c. temporum, aeris, syderum, aque, terre, modiq; habenda est ratio.*

5 *In frugibus colligendis, messis, tritura, & ventilatio necessaria est.*

EX MATHEMATICIS DISCIPLINIS.

Cap. X.

1



*Q*UONIAM cognitio rerum omnium, quæ sub contemplationem cadunt; tribus scientiis in speculatione positæ continetur, Theologia, Naturali philosophia, & Mathematicis disciplinis: propterea, cum egerimus de theologicis, naturalibusq; contemplationibus; nunc ordine differendum est de Mathematicorum scientiis.

2

Mathematica itaque, est scientia omnium certissima cum ob subiectam materiam, quam tractat; tum ob modum considerandi.

3

Materia ei subiecta nihil aliud est, quam partes, & continuum quantitatis: Mathematicus vero quantitatem hanc a corpore, & materia naturali, præsentia, & affectionibus abiunctam considerat, eamq; non modo abstrahit ab ijs, quæ ex accidenti iuncta sunt, & ab eo, quod posterius accedit; sed etiam ab eo, quod prius existit.

4


Deinde Mathematicus nullam proprie causam considerat; sed formam tantum explicat, non quidem ut refertur ad id, quod forma præditum est; sed ut ex ea colligitur affectio quantitatis, & hac ratione ex forma definit ac demonstrat, in quo maxime differt a physico.

5


Mathematicarum autem disciplinarum aliæ primæ ac simplices sunt, ut Arithmetica, Geometria, & Stereometria; aliæ intermedia inter Mathematicam & Physicam disciplinam, ut Musica, Optica, Astronomia, Astrologia, & Cosmographia.

EX ARITHMETICA.

Cap. XI.

- 1  RIMA & maxime simplex Mathematicæ discipline pars, est Arithmetica, quæ deiunctam quantitatem, id est numerum a rebus corporeis abstractum, tamquam subiectam materiam explicat.
- 2 Hic autem numerus separatus ab ipsis rebus, & is quo aliquid numeramus, uniuersæ non nisi animi comprehensione existit.
- 3 Priuatim vero numeri rebus ipsis admisti perfectæ naturæ, nullo modo a ratione emanat; sed vere cernitur in rebus ipsis.
- 4 Numerus autem mathematicorum, nihil aliud est, quam multitudo ex unitatibus numerantibus aggregata.
- 5 Quo fit, ut numeros omnes quot quot sint, communi mensura vicissim dimetiri possimus.


EX MUSICA. Cap. XII.

- 1  USICA, est ex Mathematicis disciplinis ars intermedia, & simplici Arithmetica subiecta; quæ numerum cum sono coniunctum, seu melos & concentum considerat.
- 2 Musica duplex est, una Mathematicorum, quæ ab Arithmetica sumit principia, eisque nititur, & in ea dissoluitur: altera rationis experta, quæ in solo auditu, & concentu cernitur.
- 3 Hæc autem vocalis Musica duorum est generum, alia enim simplex est, alia composita.
- 4 Simplex, unius hominis voce exprimitur: vocum autem internalla seu gradus, sex uniuersæ numerantur; quorum

ram affectiones sunt unisonus, & symphonia.

- 5 Composita vero, est harmonia & plurium vocum concentus seu symphonia, cuius conficiende plures traduntur leges.

EX GEOMETRIA. Cap. XIII.

- 1  L T E R A simplex Mathematica pars, est Geometria, quæ lineas, ac superficies a materia naturali secretas considerat.


- 2 Linea, quæ rerum longitudinem metimur, est longitudo latitudinis, & crassitudinis expers, cuius extrema sunt duo puncta.

- 3 Punctum autem, quod est magnitudinis principium, omnis magnitudinis expers intelligitur, & ex eius fluxione in longum ducti lineam procreari cogitatione concipimus.

- 4 Angulus, qui est affectio lineæ, est duarum linearum mutuus contactus.

- 5 Superficies vero, est extremitas longa, & lata, crassitudine carens, cuius extrema sunt duæ lineæ.

EX OPTICA. Cap. XIV.

- 1  P T I C E S, est intermedia disciplina inter Physicam & Mathematicorum scientias, simpliciq; Geometrie subiecta; quæ lineas a materia naturali abiunctas sumit a Geometra explicatas, easq; radijs rectis, reflexis, & refractis illustratas, quæ pertinent ad aspectum, considerat.

- 2 In optica vero tria potissimum spectantur, cernendi modus, varietas aspectus, & deceptio.


- 3 Cernendi modus duplex est, rectis radijs, ut in aere, & refractis, qui referuntur vel ad angulos aequales, ut in speculis planis, conuexis, simplicibus, & compositis, ex quo fit reflexio radiorum: vel ad angulos inæquales, ut in humore, & aqua,

& hi speciatim r adij refracti dicuntur.


- 4 *Aspectus diuersus existit, tum ex diuersa ipsius affectione & qualitate; tum ex vario ipsarum rerum, quæ cernuntur, situ, colore, magnitudine, leuitate, & densitate.*
- 5 *Decipitur autem aspectus a rerum magnitudine, paruitate, coloribus, nisi ipso, & cogitatione.*

EX STEREOMETRIA.

Cap. XV.

- 1  *OSTREMA simplex Mathematica pars, est Stereometria, quæ corpora solida a materia abiuncta per se ac simpliciter tractat.*
- 2 *Solidum, est magnitudo longitudine, latitudine, & altitudine prædita, cuius terminus est superficies seu extremitas.*
- 3 *Figura autem solida, est corpus ab una uel pluribus extremitatibus comprehensum.*
- 4 *Solidæ figuræ, sunt sphaera, conus, cylindrus, pyramis, prisma, & quinque corpora regularia tetraëdrum, cubus, octoëdrum, dodecaëdrum, & icoëdrum;*
- 5 *Sed inter omnium corporum figuras, perfectissima & capacissima est sphaera.*

EX ASTRONOMIA. Cap. XVI.

- 1  *STRONOMIA, est intermedia scientia Stereometriae subiecta, quæ corpus solidum seu sphaeram complicatam naturali materie considerat.*
- 2 *Sphaera & Mundus vniuersus distribuitur in duas partes, in caelestem atq; ætheream, & in elementariam.*
- 3 *Celum, est corpus maxime rotundum, quod sempiternis conuersionibus in orbē torquetur, rursumq; in se reuertitur.*


Ex

4 Ex quattuor autem elementis infimum, est terra, qua in medio mundi fixa, solida, atque immota per se coheret suis librata ponderibus, & cum circumfluis aquis unum efficit globum atq; tumorem.

5 In sphaera autem vertices duo sunt immoti, quorum unus arcticus seu septentrionalis dicitur, qui ad Septentrionem attolitur ac nobis semper conspicuus est: alter antarcticus seu australis appellatur, qui ad Austrum deprimitur, & nobis semper occultatur. Circuli uero ex quibus Astronomis sphaera conficitur, decem numerantur, finiens, meridianus, signifer, equator, duplices coluri equinoctiorum & solstitiorum, arcticus, antarcticus, & duo tropici aestiuus & brumalis.

EX ASTROLOGIA.

Cap. XVII.

1  STROLOGIA diuinatrix seu Haruspicina, est disciplina interiecta inter Mathematicam & Physicam, qua rerum futurarum euenta ex consensu & conspiratione caelestium corporum cum inferioribus diuinat atq; praedicat.

2 Sunt autem tria praecipua Haruspicinae principia, signifer circulus, septē stella erratica, & duodecim Caeli domus.

3 Ceterum fortuite actiones atq; consilia, quae a libera voluntate proficiuntur, nulla certa diuinandi scientia continentur.

4 Quare ea nec certo cognoscere, nec praenunciare licet.

5 Futura tamen euenta, & actiones, quae ad communes causas pertinent, & opera, quae a natura proficiuntur, ex motibus, coniunctionibus, aspectibus, & afflatibus siderum probabiliter, quamuis difficulter prouideri ac praedici possunt.

L I B E R
EX COSMOGRAPHIA, GEOGRAPHIA,
& Corographia. Cap. XVIII.

- C**OSMOGRAPHIA seu Geographia, est terra, quæ mundi pars est descriptio, & discipline media Stereometriaque subiecta, quæ terram vniuersam, eiusq; zonas, longitudinem, latitudinem, parallelos, meridianos, & climata describit.
- 2 Terra quinque sunt Zonæ uel plage quinque; Caliplagis respondentēs, una media torrida, due extremæ frigida, & glaciales, totidemq; temperate inter mediam & extremas interiectæ: omnes uero habitabiles.
- 3 Regionum & urbium longitudo, sumitur a terræ totius occasu, qui a fortunatis insulis incipit in exortum.
- 4 Latitudo uero ab æquatore sumitur in Septentrionē, uel Austrū.
- 5 Paralleli longitudinis & latitudinis in Geographia, sunt circuli inter se æque distantes ab oriente Sole in occidentem producti, qui regionum latitudinem distinguunt, & longitudinem metiuntur.
- 6 Atque hi ab umbrarum ratione triplices sunt, Amphiscij, Heteroscij, & Periscij.
- 7 Meridiani in Geographia, sunt circuli ab Austro in Septentrionem protenti & in polo concurrentes, qui regionum latitudinem dimetiuntur, & longitudinem definiunt.
- 8 Clima, quod Geographis horarum inclinatio dicitur, est terre spacium a Solis occasu in exortum extensum, & inter duos parallelos comprehensum, in quo a climatis initio ad finem accidit diei longissimi semihora uariatio.
- 9 Corographia, quæ est singularum regionum & urbium descriptio, terram per montes, maria, & fluuios metitur, atque distinguit, tabulisq; describit.
- 10 Vniuersus autem Orbis terrarum, in quattuor partes distinguitur Europam, Africam, Asiam, & Americam.

Finis Libri Primi.

M. ANT.

13

M. ANTONII
BRAGADENI.

PATRICII VENETI

DE HOMINIS FELICITATE;

VEL

DE RERVM VARIETATE

Liber Secundus.



EX MORALI PHILOSOPHIA
vniuerſe ſumpta. Cap. I.

1



M N E S principales discipline, in
quarum cognitione tractationeq; ho-
minis perfectio consistit, admirabilisq;
rerum varietas elucescit, sunt vni-
uerſe duorum generum; nam vel ad
veri contemplationem referuntur, cu-
iusmodi sunt tres iam explicata ſcien-
tiæ inspectrices; vel ad boni consecutionem, ut ceteræ disci-
pline, quæ in actione versantur.

2

Harum autem, aliæ, ad actionem & ad bonum in actione
positum, tamquam ad finem diriguntur, atque huiusmodi est
Moralis philosophia: aliæ vero ad effectiorem spectant,
quarum finis est opus, quod post muneris functionem reliqui-
quitur, ut sunt artes seu discipline effectrices. Quapro-


D

pter,

pter, cū de ijs disciplinis haftenus egerimus, qua in veri in-
uestigatione occupantur; instituti nostri ratio exposulare
videtur, ut de ceteris disciplinis, quae ad actionem & boni
adeptionem pertinent, ac primum de Morali philosophia, po-
stea de Artibus verba faciamus.

- 3 Est igitur Moralis disciplina, philosophiae pars, & in actio-
ne posita scientia, quae hominum actiones libertati subiectas,
quatenus ad virtutem & honestum institui possunt, tãquam
subiectam materiam considerat.
- 4 Sunt autem quaedam nobis innata Moralis philosophia
principia, ex quibus constat, & in quae postremo dissoluitur;
quorum alia ad intelligentiam & cognitionem; alia ad vo-
luntatem & actionem pertinent.
- 5 Distinguitur autem vniuersa Moralis philosophia in tres
praecipuas partes, in Ethicam, Oeconomicam, & Politicam:
siquidem prudentia, quae humanas actiones instituit ac mo-
deratur, & idem est re ipsa, ac Moralis scientia, vel in vnius
hominis actionibus formandis, & quod sibi vni honori atq;
utilitati sit, inquirendo ac de eo consultando versatur, ex
quo Ethica & singularis prudentia exoritur: vel in aliorum
communi procuratione cernitur, quae duplex esse potest, vel
aliorum in una familia, quae Oeconomica & domestica pruden-
tia nuncupatur; vel aliorum in aliqua ciuitate, & ex hac
existit Politica seu publica & civilis prudentia.

EX ETHICA, VEL DOCTRINA
De Moribus. Cap. II.

- I  VONIAM cuiusque hominis actiones, quas
Ethices recte instituit, ad vltimum aliquem fi-
nem referuntur; propterea omnes homines fi-
nem aliquem vnum, & rerum agendarum vl-
timum propositum habent; quod, cum optimum
sit, per se expetendum est, eiusque causa cetera omnia.

Hoc

2 Hoc autem, quamuis ex sententia Arist. in actione perfecta virtuti consentanea positum sit, tamen rectius Theologi sentiunt, summum hominis bonum in aeterni Dei videndi, perfruendique voluptate consistere.


3 Ad hunc praestantissimum finem Deo adiutore, uirtute duce, probisque actionibus peruenimus. Virtus, est bonus animi habitus in mediocritate positus, & honestis actionibus comparatus; qui in affectibus actionibusque humanis versatur.

4 Hominis actiones, quae more perficiuntur, probae sunt, cum in rebus rationi congruentibus versantur, ad optimumque finem spectant, & suo loco, ac tempore, ceterisque adiunctis consentaneae suscipiuntur.

5 Sed, ut oïno probae sint et appetitiones cogitationesque, nostra voluntas diuinae voluntati consentanea & similis esse debet.

EX OECONOMICA, ET POLITICA.

Cap. III.

1  **OECONOMICA** seu domestica prudentia, quae bonum familiae spectat, actiones & officia domestica dirigit, id est mariti & uxoris, patris & filiorum, domini & serui.

2 Uxor, non est habenda pro serua, sed vitae socia insolubili vinculo coniuncta, & consors administrationis & curae domesticae; tamen femina suapte natura dominari non debet.

3 Liberi, qui ex bonis & nobilibus parentibus non semper nobiles, & boni nascuntur, suos parentes reuereri, amare, eisque parere debent.


4 Seruorum autem munus, est suis dominis subiectos esse atque fideles, eisque omnibus in rebus honestis seruire.

5 Quamuis enim omnes homines suapte natura liberi sint; tamen ob naturae corruptelam aliqua seruitus necessaria est & naturalis. Vnde seruitutes & bella iuste iure gentium


instituta sunt : sed de ijs , quæ ad Politicam spectant , uberius & accuratius tribus libris de Rep. postea differemus .

EX IVRE PONTIFICIO.

Cap. IV.

- I  *UBLICA prudentia , quæ Politicam constituit , distinguitur in partem principalem seu architectonicam , quæ quoniam in legibus condendis versatur , Nomothetica dicitur ; & in partem minus principalem priorisque ministram , cuius munus , est exequi ea , quæ a legibus iubentur consulendo , vel indicando : Inter duas has partes interiecta est legum interpretatio , seu Iurisprudentia , quæ a Nomothetica dirigitur , & consulentem ac indicantem facultatem perficit : sed , quoniam de Nomothetica postea integro libro agemus ; nunc quædam ex iuris & legum interpretatione deprompta , ac primum ex Iuris Pontificij , postea ex Casarei iuris prudentia subiiciemus .*
- 2 *Summus Pontifex potest explicare ardua negotia sine consilio Cardinalium : Idemque solus canonum decretis , sicuti Princeps legibus , solutus est . ex rub. & c. i. ex. de Const.*
- 3 *Canonum decreta obligant Cardinales , & sunt ab omnibus seruanda . ex . c. i. eod.*
- 4 *Post completam præscriptionem , etiam si superueniat mala fides , res præscripta non est restituenda . ex . c. significasti . ex. de præscrip.*
- 5 *Furius & mente captus , nec etiam ad pias causas testari potest . ex . c. cum esses & ex c. relatum ex. de testam.*

EX IVRE CÆSAREO. Cap. V.

1  AVSSAE meri imperij, & qua speciatim
tribuuntur, delegari non possunt. ex c. 1. ff. de
offic. eius.

2 Libellus potest emendari etiam post litis con-
testationem. ex l. edita C. de eden.


3 Ius accrescendi inuectum est, ne quis partim testatus,
partim intestatus decederet. ex l. vn. C. quando non per.
par.

4 Donatio simplex, a patre filio in potestate constituto elar-
gita, in communionem non est conferenda. ex rub. C. de collat.

5 In mutuo tantundem eiusdem generis & bonitatis neces-
sario restituendum est. ex l. cum quid ff. si cer. pet.

EX CRIMI, ET FEVD. MATERIA.

Cap. VI.

1  APTORES virginum in fragranti crimine
a consanguineis deprehensi, impune interfici
possunt. ex Rub. ad l. Iul. de vi pub.


2 Qui habuit animum occidendi, etsi vulnus
tantum intulerit, capitali pana plectendus est.
ex l. is, qui cum telo C. ad l. Corn. de sycar.

3 Ex urgentibus presumptionibus, non licet hominem puni-
re ultimo supplicio. ex l. bene est. ff. si cer. pet.

4 Dominus uasalum inuitum fendo priuare non potest. ex
c. 1. de ijs, qui feud. dar. poss.

5 Feudum pecunia acquisitum, nere est feudum. ex c. 1. de
nat. feudi.

EX EFFECTRICIBVS DISCIPLINIS,
siue ex Artibus vniuerse. Cap. VII.


- 1  *X* tribus principalibus disciplinis, quas supra in inspectrices, actiuas, & efficiētes distribuimus, reliquæ sunt nobis effectrices siue Artes consideranda; quæ tamen si philosophia nomine honestanda non sunt, cū nec honestum, nec summum bonum propositum habeant; tamen homini ad animum excolendum, in eisque insignem operum varietatem cernendam, & ad corpus corroborandum, ac præcipue ciuitatibus ad bene, commode, & cum dignitate viuendum, maximas afferunt utilitates; Quare, ut ordo requirit, & ut antea proposuimus, aliqua ex Artibus depromenda nobis sunt.
- 2 Artium itaque omnium principium, est ratio & humana intelligentia habitu artis, quæ propterea rerum efficiendarum recta ratio desinitur; finis vniuerse quarūdam est opus, quod post molitionem relinquitur; quarundam vero est sola actio.
- 3 Artium autem multa sunt genera, nam aliæ ad animum excolendum & infermandum comparatæ sunt, ut Musica, Grammatica, ac reliquæ ingenuo & libero homine dignæ: aliæ ad corpus alendum, tuendum, & conseruandum, ut Agricultura, Ars pastoralis, Venatus, Piscatus, Ars coquinaria, Gymnastica, & Medicina: aliæ ad rem familiarem amplificandam, & ad commoditatem ac voluptatem inuentæ sunt, ut Nauigatio, Ars numaria, Ars fabrilis, Sutoria, Pictura, Cælatura, Sculptura & id genus aliæ: postremo aliæ ad urbem cōstruendam & ciuitatem tuendam repertæ sunt, ut Architectura, Ars militaris, Mechanicæ seu machinarum discipline, munitiones &c.
- 4 Harum autem, quedam principales sunt & quasi domina ceterarum, quas Græci ἀρχιτεκτονικὰς appellant: aliæ sunt

sunt ministra & quasi ancilla, quæ principali inserviunt. Principes artes, aliæ sunt utentes & imperantes; aliæ non utentes; sed operi efficiendo assistentes: administræ vero, quedam materiam suppeditant & preparant: quedam ex principalis artis præscripto opus consciunt.

- 5 Denique, ne plures artium divisiones consecuter, aliæ sunt ingenuæ & libero homine dignæ; aliæ sordidæ & illiberales.

EX ARTE MILITARI.

Cap. VIII.

- 1  *X omnibus artibus, Ciuitati maxime necessaria est ars militaris; ut cines utroque tempore salui ac tuti esse possint.*

- 2 *Eius finis est victoria, seu pax; munus vero Imperatoris, est strenue se gerere in bello, & apte ad consequendam victoriam decertare.*

- 4 *In optimo Duce requiritur strenui militis vis & robur, militaris disciplina, & Mathematicarum scientiarum notitia, præsertim Arithmetica, Geometria, Cosmographie, Astrologia, & Machinarum cognitio.*

- 4 *Exercitui vero quattuor maxime necessaria censentur, comeatus, bona valetudo, rei militaris scientia, & obedientia.*

- 5 *Comeatus, annona & alimentorum copia paratur; optima valetudo, a Medicis & Chyrurgis restituitur, conseruaturque copijs castrametandis salubrium locorum delectu; scientia militaris, arte comparatur frequentiq; exercitatione in gymnico certamine perficitur; obedientia vero, legibus retinetur.*

L I B E R
EX INSTRUMENTARIIS DISCIPLINIS;
ac primum ex Grammatica. Cap. IX.

1



VMANAE intelligentiæ vis, ita natura comparata est, ut ex ignorantia tenebris ad sapientiæ splendorem sine alicuius adminiculo, & quasi instrumento peruenire non possit: id autem est oratio, & ratiocinatio; quæ duo nobis sunt instrumenta ad sapientiam comparandam: sed, quoniam ea rudia nobis a natura tribuuntur, arte & diligentia componenda & dirigenda sunt, ut scientias constituere, adiscere, & docere possimus; quod instrumentarijs disciplinis consequimur, Grammatica, quæ orationem, & Logica, quæ ratiocinationem dirigit.

2 Grammatica enim est ars recte loquendi & scribendi, quæ versatur in sola oratione congruenti, eiusque constructione, atque compositione.

3 Cõgruens autem oratio spectatur vniuersè in octo partibus orõnis.

4 Grammatica quattuor sunt partes, Orthographia, Prosodia, Ethymologia, & Syntaxis.

5 Ceterum unicuique linguae quædam proprietates conueniunt, ut sanctæ rerum proprietatem, & perfectiorem naturæ significationem notare, ac mysteria nominibus continere; græcæ, multa vno nomine significare; latinæ copiosa, pura, numerosa, & concinna oratio; italicæ vero, suavis, mollis, & comptus sermo.

E X L O G I C A. Cap. X.

1



LTERVM instrumentum ad scientias capescendas, est Logica; cuius subiecta materia, sunt rerum secundæ notiones, quatenus inferuiunt ad primas explicandas.

2

Quare, cum tradat instrumenta sciendi, ad omnes scientias perfecte discendas atque tractandas, omnino necessaria est.


Sunt

3 *Sunt autem vniuerſe duo perfectæ, & proxima certæ ſcientiæ comparandæ instrumenta, Definitio, & Argumentatio, ad quæ cetera omnia instrumenta cognoscendi commodè reuocari poſſunt.*

4 *Propria vero ac perfectiſſima argumentatio, eſt tantum ſyllogiſmus, a quo ceteræ tres minus perfectæ ratiocinandi formæ Enthymema, Exemplum, & Inductio neceſſariam concludendi vim mutuantur.*

5 *Verum ad rerum ſcientiam ſpeciatiim conſequendam, perfectæ instrumenta, ſunt Definitio & Demonstratio: Definitio, eſt oratio, quæ vocis, vel rei alicuius naturam propriè, dilucide ac breuiter explicat: Demonstratio, eſt neceſſaria conclusio ſcientiam afferens; vel ratiocinatio, quæ ex propoſitionibus, veris, primis, quæ probatione nõ egent, notioribus, prioribus, cauſiſque conclusionis efficitur: eaque duplex eſt una ex cauſis, altera ex effectis.*

EX RHETORICA. Cap. XI.

1  *X rationis, orationiſque conformatione in actione poſita, tres vberriimi fructus, & præclariffimæ facultates exoriantur, eloquentia, ſeu eius exoranda Ars Rhetorica, Hiſtoria, & Poetica.*

2 *Eloquentia inſtructa rebus, eſt præſtantiſſima facultas maxime utilis & neceſſaria in omni bene conſtituta Rep.*

3 *Quapropter Orator debet eſſe omnium rerum humanarũ, ac diuinarum cognitione peritus.*

4 *Eloquentia enim, quæ non ſit cum philoſophia & ſapientia coniuncta, inanis & ieiuna verborum poſſuentia potius, quam eloquentia cenſenda eſt.*

5 *Tuebimur præterea quidquid ſcripſimus in quinque libris, alias a nobis editis, de Arte Oratoria.*

EX METHODO HISTORIÆ.

Cap. XII.

1 **H**ISTORIA, cum homini ad rectam vitæ institutionem & ad civilem prudentiam comparandam; tum Reip. ad rerum gestarum memoriam conservandam, adeo maximum affert adiumentum; ut non modo utilis, sed etiam necessaria sit.

2 Historia vero, quæ est accurata & perpetua rerum narratio, proprie ac speciatim annalium Urbis narrationem, id est rerum, quæ singulo quoque anno in aliqua Ciuitate, vel regione a ciuibus geruntur, & insignium euentorum expositionem continet.

3 Eius tres præcipuæ ac perpetuæ leges traduntur, prima, ut factum & res sicuti gesta est, vere narretur: altera, ut loci Corographia, ubi res gesta est, accurate describatur: postrema, ut tempus adijciatur, ac distinguatur.

4 Historicus autem summo iudicio, summaq; prudentia, & multarum rerum præcipue humanarum cognitione instructus, summaq; eloquentia præditus esse debet; & tenere hominum propria nomina, locorum, & temporum.

5 Historici partes, sunt res gestas vere ac sincere exponere, nihil gratia vel odio ductus commentitium addendo, vel quod memoria dignum sit, prætereundo; atque adeo simpliciter narrare, ut lectori libere iudicandi locus relinquatur.

EX POETICA.

Cap. XIII.

1 **P**OETICA, præcipue in fabula, & imitatione sibi propria versatur.

2 Poeticæ vero imitationis tria oïno sunt genera, quibus alicuius mores effingi possunt, vñ actionis, alterum

rum sermonis, postremum cantus seu modulationis.

3 *Eius autem species seu forma, septem potissimum numerantur, Epopœia, Tragœdia, Comœdia, Dithyrambica, Aulica, Citaristica, & Orchestrica.*

4 *Tragœdiæ partes, sex numero sunt, fabula, mores, dictio, sententia, apparatus, & melopœia.*

5 *Est autem Tragœdia Epopœia præstantior.*

PRONVNCIATA, in quibus dissentimus a Scolaſticiſ Theologiſ

D. Thoma Aquinate, Aegidio Columna, Henrico Gandauense, & Ioanne Scoto.



QUONIAM non tam vilius philosophi auctoritas in studijs & disputando, quam rationis momenta spectanda sunt, præstatque vel auctore Arist. semper pluriſ facere veritatem, quam amicitiã & auctoritatem; propterea ita a principio studiõrũ nostrorum rationem instituimus, vt nullius sententiæ vel auctoritati addicti, iuraremus in verba Magistri; sed quid in quoque esset præclarum, probaremus, quod vero minus, repudiaremus. Ea de causa præcipua quedam, in quibus a præstantissimis philosophis dissentimus, proponimus excutienda.

1 *Deus Opt. Max. præpotenti sua vi, re ipsa potest efficere aliquid infinitum, quod sit continuatum vel deiunctum.* Negat fere oēs.

Negat D. Th. 1.
p. q. 5. ar. 4.

2 *Angeli, numero differunt, non autem specie.*

Ait Aegid. qdli.
5. q. 8.

3 *Beati, non ita necessario delectantur, vt Dei vi absoluta delectatio ab eis separari non possit.*

Ait Henr. qdli.
1. q. 8. & quod.
3. q. 9.

4 *Res creatæ, ex æternitate non fuerunt præditæ essentia distincta a diuina natura, qua referrantur ad Deum tamquam ad exemplar.*

Ait Scot. 1. sent.
d. 1. q. 2. art. 2.

5 *Diuina essentia, nullo modo videri potest absq; personis.*

Ab Academicis discrepamus in ijs.

Ait Plat. in Parm.
me. Alcim. de
doct. Plat. c. 9.

I



EO non modo, tribuende sunt ideae, quibus distincte species cognoscatur; sed etiam distincta singulorum cognitio.

2

Vniuersalia non sunt ideae separate.

In Menon. &
phæd.

3

Nostra sciētia nō est a natura recordatione.

In Timæo. re.
de Repub. & in
phæd. idē Iamb.
& Syri.

4

Calum non constat ex elementis, vel ex purissima natura & eminentijs qualitatum elementorum: nec item caelestes orbes, nec singulae stellæ anima proprie constant, quæ sit eiusdem generis cum hominis anima.

Ait Ploti. Enea.
4. lib. 4.

5

Sensus est perceptio, non autem actio solius animæ.

A Peripateticis Græcis

Alexandro, Ammonio, Philopono, Simplicio, & Themistio.

Ait Alex. refer.
Aner. 3. met.

I



VATTVOR primæ qualitates non sunt elementorum formæ essentialis.

Negat Ammo.

2

Definitio, non autem demonstratio est præstantius instrumentum sciendi.

Ait Philop. 2.
phy. com. 1.

3

Non est imminuta & manca Natura definitio tradita ab Arist. nec alia verba addenda sunt.

Ait Simplicio.
2. phy. com. 3. &
16.

4

Natura non est tantum principium patiendi; sed etiam agendi eiusq; definitio optime congruit animæ.

Ait Them. 1. 2.
de ani.

5

Cortex non est instrumentum sensus tactus.

Positiones aduersus Peripateticos Arabes

Auicembron, Auempacem, Alpharabium, Auicennam, & Auerroem.

Ait Auicemb.
refer. Aucr. 9.
met. 7.

I



OLVS Deus non producit & efficit res inferiores; sed etiam naturales causæ efficientes, vi sua conspirant ad res producendas.

Negat Auemp.
& Alphar. refer.
Aucr. 4. phy. 43.

2


Vltima sphaera non modo tribuendus est locus intra

intra se, sed etiam extra se.

- 3 *Materia prima non habet imperfectam formam corporis sibi coenam.* Ait Auc. 1. sue
inist. cap. 2. & 2.
tract. met. c. 2.
- 4 *Propria hominis forma non est cogitandi vis a mente & intelligentia distincta.* Ait Auer. li. 3. d.
aut. com. 5. 6.
20. 33.
- 5 *Animal ex putredine & ex semine procreatum, est eiusdem speciei.* Idem negat. 8.
phy. com. 46.

Aduersus opinionem Peripateticorum Latinorū.

Boethij, Alber. mag. D. Thomæ, Aegidij, Scoti, & Ochani.

- 1  *ERV M status seu existentia, re ipsa non distinguitur ab essentia.* Aiant plerique
Latinorum.
- 2 *Totum, non est aliqua natura ab ipsis partibus re ipsa distincta; sed est ipsa met copulatio partium.*
- 3 *Cognitio quinque Vocum non modo est utilis, sed omnino necessaria ad Logicam addiscendam.* Neque Boet. in
proc. porph. a se
transl.
- 4 *Cum corpus viuens augetur, uniuerse non manet eadem numero viuents forma.* Ait Albe. opus
de nutr. tr. 1. c.
2. & tr. 2. c. 1.
- 5 *Materia prima, non est pura potestas.* Ait D. Th. 2. se.
d. 12. q. 4. 1. p. q.
7. art. 2. ad 3.
- 6 *Principium constitutionis individui, non est materia, sed forma.* Ait idē 1. p. q. 3.
ar. 2. & 3. Aeg.
gid. in qd. q. 12.
- 7 *Principium & causa cur aliquid volumus, non est res ab intelligentia cognita, sed voluntas est causa efficiens suarum appetitionum.* Idem 3. quod.
q. 16.
- 8 *Anima facultates nec sunt idem omnino cum subiecto, nec ratione tantum; sed re ipsa distinguuntur.* Ait Scot. 2. sen.
d. 16. q. 1.
- 9 *Species rerum, qua intelligi possunt, non imprimuntur nostre intelligentie.* Ait idē. 1. sen.
3. q. 6.
- 10 *Malum, qua malum est, sub voluntatem & appetitionem nostram non cadit; sed quoniam id, tamquam natura contrarium nolumus atque refugimus.* Ait Ochani. 3.
sen. d. 13.

Ad

Aduersus opinionem Interpretum Iuris Pontificij.

Gloss. 10. Andr. Innocent. Abbat. Felin. & Deci.

1. Aiant fere omnes gl. & Ab. in c. Eccles. 5. Mar. ver. personis ex. de constit.

2. Ait To. And. i. c. si pater, de test. in 6.



ATRIMONIUM Clericorum non gaudet privilegij ecclesiasticis; sed ea tantum bona, quorū titulo Clerici sacros ordines susceperūt.

Compendiosa substitutio facta impuberi a pagano uerbis directis sustineri non potest post pubertatem.

3. Ait Innoc. in c. ceterū de iudi.

4. Ait Abb. in c. cū sit gener. n. 4. de for. compet.

5. Negat Felin. in c. Antigon. ex. de pact.

6. Negat Dec. in c. in presentia nu. 2. 1. de probat.

Ecclesia iure non debet cognoscere quancunque oppressio- nem Clericorum & pauperum: unde qui inuadit patrimo- nium Clericorum, non sortitur mistum forum.

Pactum nudum parit actionem ex iure canonico.

Condicio, si decesserit sine liberis, vera est in Ecclesia, non in filijs naturalibus.

Aduersus opinionem Interpretum Iuris Cæsarei.

Accur. Bart. Bal. Alex. & Dec.

1. Aiant fere oēs.

2. Negant omnes antiq. & Accur. in auth. nisi tri- cūale. C. abbon. mater.

3. Ait Bart. in au- th. cessante C. d leg. hær. l. post consang. §. hær. red. ff. d leg. hær. Ait Bal. in l. hu- manitatis inui- tu in §. col. ver. 4. opp. C. de im- puber.

4. Negat Alex. in l. 1. nu. 37. ff. si cer. pet.

5. Ait Dec. in l. 1. §. si cer. pet.



VPILLARIS expressa non excludit ma- trem a legitima.

In iure civili ex prescriptione non solum ac- quiritur utile, sed etiam directum dominium.

Filij fratrum, si nullus patruus existat, pro capite, non autem pro stirpe adeunt patruī hereditatem: pater vero, cum reliquit aliquid filio nomine legitima, non videtur reli- quisse iure institutionis.

Proprie creditor est is, cui ex legato, vel ex delicto ali- quid debetur.

Rubrica generalior nigro, nō semper restringitur a nigro.

ACINATPARADOXA.

1 **H**ONESTVM propter voluptatem est expetendum.

2 Omnia fortuita, sunt omnino necessaria.

3 Qui vnum non intelligit, nihil intelligit.

4 Calum, quod perpetuo mouetur, semper quiescit.

5 Terra, cum grauiſſima ſit, omnium leuiſſima eſt.

6 Dimidium plus toto.

7 Mors eſt in bonis numeranda.

8 Melius eſt otioſum eſſe, quam nihil agere.

9 Aequalitas omnia perdit.

10 Qui vult calum aſcendere, debet e calo deſcendere.

PROBLEMA.

1 **V**TRVM Deus humanam carnem aſſumpſiſſet, niſi Adam peccaſſet.

2 Vtrum quantitas continua infinite ſecari poſſit.

3 Vtrum ſit Fatum, Caſus, & Fortuna.

4 Vtrum ſit vna ſcientia Mathematica, communis Arithmetica, & Geometria.

5 Vtrum pecuniarum copia ſint appellanda diuitie.

6 Vtrum ius accreſcendi præcipue oriatur a mente teſtatoris, an ab ipſa lege.


7 Vtrum donatio omnium bonorum præſentium & futurorum facta eccleſie ab homine ſui iuris, ſuſtineri poſſit.

8 Vtrum ignorantia competat beneficium reſtitutionis in integrum contra præſcribentem, ex clauſula, ſi qua mihi iuſta cauſa.

9 Vtrum Logica ſit ars, vel ſcientia.

10 Vtrum natura vniuerſalis equaliter & pari ratione, an ab vno dicatur de quinque vocibus.

RE BIBLID L 2
 ANIGMATA INTERPRETANDA.

- Psalm. 71. vers. 16. 1  *T* erit firmamētum in terra in summis montium.
- Zoroast. 2 *P*aterna mens cunctis inseminauit vinculum
 igni gravis amoris.
- Trisane. 3 *E*t extra ipsam quidquam, & ipsum extra
 quidquam.
- Orpha. 4 *T*res sunt Mundi Principes, trium ordinum domini, Ori-
 masis, Mithris, Arimanis.
- Plat. 5 *A*nima vivit cum Saturno, cum Ioue, Marte, Venere, &
 Mercurio.

Finis Libri Secundi.



M. ANTONII BRAGADENI.

PATRICII VENETI,

DE HOMINIS FELICITATE

Liber Tertius.

IN QVO

DE REPUBLICA DISSERITVR.



De felicitate in actione & Reip. administra-
tione sita. Cap. I.



*HOMO, qui solus ex omnibus animanti-
bus natura factus, diuinoq; consilio de-
stinatus est ad eternam felicitatem; ut
hic primum eam meditari, perfectoque
uiuendi modo imitari posset: deinde in
caelestium consortio ea frueretur auo sem-
piterno; hoc precipue singulari munere
donatus est, quod Præpot. Deo similis effectus sit, ac totius di-
uinitatis imaginem præ se ferat. Nam quemadmodum eter-
ni Patris fecunda memoria, Filij intelligentia, & Sacri Spi-
ritus amore diuinitas omnis continetur; ita homo ad totius
diuinitatis adumbratam imaginem referendam, triplici ani-
mi facultate, Dei concessu ac munere præditus est, memoria,*

F

intelli-

intelligentia, & voluntate. Harum ui humana mens primum se ipsam nouit & amat: deinde rerum conditarum naturam perscrutatur, in ijsq; diuinitatis vestigium intuetur: postremo Deum summum opificem agnoscit, cum ipsiq; arcto amoris vinculo copulatur; ex quo hominis animo insidet inustum diuinae Trinitatis simulacrum. Est autem homini cum DEO similitudo, tum quia iustus, rectus, atque immortalis animus est ei ab immortali Deo datus, & virtutis amor ac studium ingeneratum: tum quia rationis beneficio singulari, animantes rationis expertes longe antecellit; quin omnium rerum, quae intra Lunae complexum continentur, administrator & princeps a Deo constitutus est; ut qui conditorem suum multis alijs rebus maximisq; muneribus exprimeret, summum eius imperiū ac prouidentiam imitando, eiusdem similis etiam potestate & gubernatione redderetur. Quemadmodum autem in diuina prouidentia adeo summam potestatem, sapientiam & bonitatem agnoscimus; ut Deum cuncta posse, scire, ac velle exploratum sit: ita homo triplici habitu efficiendi, contemplandi, & agendi, quibus, ingenium, mentem, ac voluntatem perficit, & vniuersa cognoscere, efficere, ac moderari potest; ad summam Dei prouidentiam & similitudinem accedit. Nam primum earum rerum, quas natura nobis occultauit inuestigatione, ceterarumq; plane omnium, quae in caelo, mari, terrisq; reperiuntur, contemplatione diuinarumq; rerum scientia, homo diuinam sapientiam emulatur: deinde viribus ingenij, quibus in artium effectiōibus, eius manu atque opera accedente, ex rudis materia insignia rerum simulacra effingit; summam Dei potentiam modo quodam adumbrare videtur: postremo virtutibus adiunctis, honestisq; actionibus sponte susceptis, rerumq; ciuiliū administratione, diuinam bonitatem ac procuratiōem imitatur, insignemq; immortalis Dei similitudinem refert; ut iure mortalis Deus in terris sit, ac dici mereatur. Quocirca ei, qui diuinam hanc similitudinem, quae summa est hominis perfectio atque felicitas, exprimere & consequi studet; non satis est

tis est umbratilem solitariamq; vitam in rerum contemplatione positam degere, vel in artium operibus tantum elaborare; sed par est in primis præclaris actionibus illis insistere, quibus, & sui, & aliorum hominum mores formantur, & familia bene instituitur, & Resp. recte administratur. Quæ quoniam ex Ciuili scientia deriuantur, satiq; de rerum multiplici cognitione, & de artium operibus, duobus libris De Rerum Varietate diximus, quibus Dei sapientiam & potestatem infinitam emulamur; nunc ut similes Deo vndeque pro viribus esse possimus, de Reip. procuratore & Legibus, quibus diuinam administrationem imitamur, differendum est: implorato tamen prius Dei auxilio, a quo tum omnium maximarum rerum, tum præcipue Ciuitatum principia ducuntur.

De prima constitutione Reip.; ac primum
Quid sit Resp., quid Ciuitas, & quæ huius
primordia. Cap. II.



ESPUBLICA, est recta magistratuum & eius præcipue, qui summam obtinet potestatem constitutio, totiusq; ciuitatis ad communem felicitatem legibus moderata descriptio.

Ciuitas vero, quæ Reip. subiecta materia existimatur, nihil aliud est, quam familiarum necessariarumque rerum suadente natura in vita communione, vnius Urbis legibus congregatarum, ad bene beateq; viuendum summa potestate administrata multitudo.

Quæ ab immortalis Deo a primo ortu profecta est: deinde a natura parais initijs inchoata: tum hominum mutuis rerum & officiorum indigentis constituta, & legibus ad extremum aucta, temporisque diuturnitate ad summum decus & ornamentum euecta.

Nā principio idē oīum parēs Deus, cū vniuersum Orbē terrarū tāquam magnā Urbē & cōe domiciliū hoīum condidisset;

a se cōstitutū ēt voluptatis omniumq; commodorum locum delegit, qui terrestris Paradisus appellatur, tamquam Urbem & solum ciuitatis, in quo genus humanum vitæ ac rerum cōiōne conseruaretur: in eoq; hominem collocauit, ut quemadmodum ipse alijs impertitur bonitatem suam immensam; ita homo virtute præstans, & sapientiam communicaret, & iustitia atque prudentia esset alijs adiumento: atque hoc modo recte agendo, Urbem diuino munere concessam tueretur & custodiret.

A natura vero ciuitas originem ducit, quoniā homo est animal suapte natura ciuile, aptum ad cōtus, natumq; ad agendū: deinde, quoniam congregationum instituendarum causa, hominem ex omnibus animantibus solum, rationis atque sermonis natura voluit esse participem.

Nam ratione primum homines quid bonum, malumue sentiunt; quid iustum, quid iniustum tacito sensu dijudicant; quod arbitrātur bonum tamquam suarum actionum scopum sibi proponunt, & ut adipiscantur omni studio atque labore contendunt: hoc autem, quamuis ex tribus bonorum generibus, quibus perfecta felicitas cōtinetur, tantum in animi bonis positum sit; cum sola virtus beatum hominem efficiat; tamen si corporis & fortune bonis cumuletur, facile intelligunt fore beatissimam vitam, longeq; incundiorem. Quare ut his virtutis ornamentis & rerum externarum copijs homines abundarent, vnum in locum congregati, in vitæ ac rerum communitate coaluerunt.

Iam vero natura ingenerauit homini libidinem cōiunctionis & procreandi appetitum, ratioq; suadet homini connubia incunda, ut filiorum susceptione in illis oris & animi sui effigiem intueri, seq; immortalem in genere conseruare suo possit; exuscitatque natura præcipuum quendam amorem & curam eorum, quæ procreata sunt; ut summa ope nitantur parare ea, quæ necessaria sunt ad cultum & victum, quæ homini in solitudine atq; in agro vitā degenti suppetere nullo modo possunt.

Oratio vero, homini est a natura tributa ad explicandum
quid

quid bonum, quid utile, quid honestum, quid iustum, quid iniustum, & animi sensa inter nos communicanda docendo, ratio- cinando, disceptando, iudicando; quod hominem homini conciliat, deuincitq; naturali quadam orationis & vita societate.

Denique, vita necessitate cogente & opportunitatibus ac rerum egestate, sunt hominum constitutæ societates; ut cum rerum permutatione & affluentia: tum dissimilium officiorum vicissitudine homines sibi mutuo prodesse possent. Atque ita Dei, Naturæ, & Hominis conspiratione Ciuitas constituta est.

De partibus Ciuitatis, ac primum
de Familia. Cap. III.



CIUITAS omnis duabus ex partibus conflatur, ex familijs, & vicis; quæ sunt seminarium ciuitatis, & initia nascentis Reipublicæ.

Familia, est plurium patrisfamilias imperio subiectorum, & rerum domesticarum ad vitam quotidianam, & privatam utilitatem naturalis societas.

Omnis autem familia conficitur vniuerse duabus ex partibus personis, & re familiari.

Personæ, sunt paterfamilias seu maritus & dominus, uxor seu materfamilias, liberi, & serui: ex quarum uaria copulatione tres existunt minima familie partes, ac primæ conso- ciationes specie distinctæ, una domini & serui ad usus & com- moda uitæ quotidianæ, iure atq; natura constituta, quæ herilis potestas seu dominatus appellatur; altera uiri & uxoris pro- creationis & speciei conseruationis causa, naturali coniun- ctione copulata, quæ uxoria seu coniugalis potestas dicitur: postrema patris & liberorum, agnatione & iure sanguinis iun- cta, quæ patriæ potestas nuncupatur.

Res autem familiaris, domicilium & opes complectitur. Domicilium seu domus, est tectum, quod homines initio neces- sitate coacti, sibi ex ædificarunt ad uitæ usus & commoda, et ad
pro.

propulsandas cæli iniurias, ferarumq; incurfiones; quod principium & origo Urbis exiftit.

Opes & res familie neceffaria, funt ea omnia, quæ ad priuatum cultum, ad victum, & ad curam domesticam pertinent.

Quæ duplici ratione parantur, vna naturali & arte perfecta, quæ in alimentorum, & rerum querendarum ſcientia verſatur, vt agricultura, venatu, aucupio, piſcatu, & id genus alijs: altera artiſicioſa tantum, quæ lucrum & queſtum, atque pecuniam & artem parandarum diuitiarum propoſitam habet, vt artibus & opificijs.

De Vico. Cap. IV.



ALTERA pars Ciuitatis, eſt vicus, qui deſcribitur plurium familiarum coherentium & vnius ſenioris poteſtati ob ſanguinis coniunctionem ſubiectarum, diuturni uſus cauſſa conſociatio.

Nam, ſicuti ex pluribus perſonis in vna domo, certa æconomia ſociatis, conſtatur familia; ita ex multis continuatis propinquorum familijs, & a viro maximo natu adminiſtratis, vicus coaleſcit.

Cum enim viri atque uxoris coniugium, liberorum procreatione, conſecutæ eſſent fratrum, ſororumque coniunctiones: poſtea nepotũ, & patruclium: tum conſobrinorum & ſobrinorum affinitates, & ab vna radice familie plures propagatæ eſſent; nec vnius domicilij tecto omnes ſtare poſſent; alias domos priori coherentes ob vite neceſſitatem ſibi conſtruxerunt, & ex prima in has exierunt, ſenioris tamen imperio ob agnationis vinculum obtemperantes: ita domorum continuatione, & familiarum coniunctione vici extiterunt.

Sed, cum temporis diuturnitate, celebratis connubijs, late propagarentur, adeoque multiplicati homines excreſcerent, ut in vicis ac pagis capi non poſſent; in vnã urbem ac ciuitatem

tem legibus temperatam communi consensu coiuerunt: atq; ita maris & femine prima coniunctio, quæ familia nuncupatur; & propinquorum propagatio, ex qua vicus effluxit, principium est & origo ciuitatis.

Derebus communibus, & necessarijs in Ciuitate.
Cap. V.



QVONIAM, qui primum ab incultiori vita ad civilem societatem traducti sunt, non modo viuendi, sed etiam bene viuendi causa in unam Urbem conuenerunt: propterea quæ necessaria sunt ad uictum, & cultum, ac dignitatem, & quæ cunque pertinent ad commodè, bene, beateque uiuendum, in ciuitate omnino suppetere debent: sordida enim planeque misera eorum uita futura est, si quæ necessitas tantum expositulat, nõ etiam quæ dignitas & ornatus, illis civilis communio suppeditet.

Hæc autem dabit agricultura primum, quæ parantur alimenta ex ijs, quæ intra, extraque nascuntur: deinde merceatura, quæ navigatione & unctione eorum, quæ importantur & exportantur, ac rebus contrahendis, & permutandis, mercium & rerum copiam affert ciuitati: postremo artium uaria genera & opificia, quamplurima commoda, ornatum, & rerum omnium affluentiam artificum opera in ciuitate subministrant.

Quis optimus sit Reip. finis. Cap. VI.



CVIVSCVNQVE optimæ Reip. finis propositus, est summum bonum; cum enim societas omnis boni alicuius causa constituta sit; ea vel maxime, quæ princeps est, & ceteras omnes continet, cuiusmodi est ciuitas, summum præcipuumq; bonum propositum habere

bere debet : omnium autem præstantissimum est diuinus cultus , seu vita cum virtute coniuncta , quæ habeat homini quod satis est ad bene beateque viuendum , tantumque rerum externarum copijs abundet , vt qui in ciuili societate viuit , actiones virtuti cõsentaneas commode , ac diuturne exercere possit.

Sed intelligendum est , magis bonorum animi , quam corporis & fortune rationem habendam esse ; siquidem virtutes non a bonis externis ; sed externa ab animi bonis quaruntur ; & conseruantur ; & beata vita potius ad eos pertinet , qui moribus virtutumq; ornamētis instructi , longe ceteros antecellunt , & modica diuitiarum habent adiumenta ; quam , qui virtute & veris animi bonis destituti , maximis externorum bonorum copijs abundant.

Quare , cum optimos quæq; Resp. beatam vitam propositam habeat tanquam rerum agendarum vltimum : unicuique ciuium publice , ac priuatim , optimum vite genus cum virtute coniunctum maxime expetendum est , atque incundum.

Nam facile intelligi potest , tum denique optimam ac perbeatam fore ciuitatem , cum huiusmodi finem fuerit consecuta .

De Reip. effectricibus causis . Cap. VII.



FFICIENTES Reip. causæ tres eadem sunt , quæ & ciuitatis , DEVS , Natura , & Hominis prudentia ; sed ratione diuersæ .

Primum itaque Deus , cum summum optimumq; imperium teneat vniuersi Orbis terrarum , et hominem totius Mundi quasi magnæ ciuitatis ciuem & administratorem effecisset ; rectam ciuiliū rerum procurandarum rationem ei commonstrauit , cumque suæ administrationis imitatore constituit .

Natura vero iusti atque iniusti notitiam , qua omnis Resp. continetur , animis nostris ingenerauit : deinde insitam prudentiam & vim ad prospiciendum , consulendumq; tribuit : postremo

stremo in rerum naturalium serie, & ceterorum animantium principatu, Reipub. bene administrandæ speciem quandam ac imitationem proponit.

Denique Hominis prudentia leges condit, principatum & magistratus constituit, iura ciuilia describit, mala imminetia prospicit & propulsat, ius dicit, omnemq; ciuitatē moderatur.

De forma Reip. seu de hominis imperio.

Cap. VIII.



HOMINIS imperium, quod ei non modo in bruta animantia, sed etiam in ceteros homines singulari munere a Deo concessum est, uniuerse duorum est generum, vnum naturale, alterum ciuile.

Naturale, est hominis consilio & virtute præstantis inter alios virtute atque prudentia inferiores a natura constitutus dominatus.

Nam, qui ratione & prudentia præstat, & consilio potest longe prospicere, ille iure natura præst & imperat; qui vero munitus est a natura viribus corporis ad consilij iussa obeunda & exequenda, natura paret & seruit.

Ciuile autem, nihil aliud est, quã legitima & summa vnius, vel plurium ad communem subiectorum salutem, ciuitatis recte administrandæ ciuium consensu tradita potestas.

Hoc imperij genus, vel legibus & iure ciuili, vel sorte, vel sanguinis & hereditario iure, vel delectu & suffragijs deferatur: eadem est ratio seruitutis.

Ceterum ciuile imperium, necessario constat ex principe & subiectis populis, seu administratore & cive ac plebe; quorum alter sine alterius ope, nullo modo potest consistere.

De Principe & gubernatore. Cap. IX.



PRINCEPS, est summus rerum civilium administrator, iure civili constitutus, qui subiectos populos apte ad optimum & commune bonum dirigit.

Atque is in civili hominum societate omnino necessarius est; ut communi bono prospiciat, ius dicat ceteris ciuibus, & multitudinem a potentioribus tueatur.

Optimi principis munus, est precipere, premijs afficere, summos cum infimis coniungere & pari iure retinere, summoque cum honore praeesse.

Hic vero, cui Reip. gubernacula comissa sunt, generatim duae praecipue virtutes necessariae censentur, probitas, & copiose loquens sapientia.

Probitas quidem & vitae integritas, quia Principum vitijs inficitur ciuitas uniuersa, virtutibus autem, ut pietate in Deum, iustitia, equitate, fortitudine, temperantia, clementia, & liberalitate perficitur & conseruatur; cum enim ciues Principum morum assidui spectatores & imitatores existant; qualescunque principes & summi ciuitatis viri sunt, tales ipsi quoque plerunque solent euadere.

Prudentia vero desideratur & non indiferta doctrina, ut ea longe prospiciat, prudenter saluti Reip. consulat, leges constituat, cum dignitate sententiam dicat, iura describat, bonos tueatur, laudet uirtute claros, uituperet improbos, & summam dignitatem aequet rationis praestantia, & orationis splendore illustret.

Quae omnia principis munera absque eruditione, eloquentia, & probitate recte obire non potest, nec laudem aut honorem meretur; cum hac uirtuti praecipue debeantur.

Quid sit ciuis, & cuiusmodi esse debeat.

Cap. X.



CIVIS generatim, est homo liber ac socius vitæ ac rerum communione, qui legibus vivit & immunitatibus civitatis pro suo iure fruitur.

Civium plura sunt genera; nam alij quodammodo ciues nominantur, ut ij, quibus inter ipsos est officij iurisq; societas, & eiusdem Urbis ac vitæ communio; sed eis non patet aditus ad honores & magistratus: alij sunt ciues simpliciter ac proprie, qui ciuis nomine maxime digni sunt, ut ij, qui iudicij, magistratusq; possunt esse participes.

Utilis autem civitatibus, salutarisq; ciuis, qui aliquando præest & imperat, aliquando paret, tribus præcipue virtutibus præditus esse debet, temperantia, fortitudine, atque iustitia prudentia moderatis.

Temperantia, ut cum prosperis in rebus, tum in aduersis modum adhibeat, omnibusque in rebus sciat inter nimium ac parum servare mediocritatem.

Fortitudine, ut Reip. salutis causa, considerata pericula animo infracto suscipiat, mala & incommoda patria obuenientia, & quicunq; casus inciderint, eos perferat toleranter, semperq; Remp. siue bellicis in rebus, siue in urbanis difficultatibus quassatum & circumuentam, omni studio & contentione adiuuare conetur, consilio, & auctoritate subleuet, succurrat saluti communibus facultatibus, opibus, amicis, & oblitus salutis & commodorum suorum, omnes labores & cruciatus perferendos, mortem denique ipsam oppetendam potius existimet, quam officium & pietatem in patriam deserat.

Iustitia denique, ut ius cuiusq; & equalitatem omni ratione colendo, & retinendo pulchre, honeste atque legitime regat, & gubernetur; & optimi rectoris, ac boni subditi explere possit officium.

Ciuis autem simpliciter bonus, & omni ex parte perfectus, cunctis virtutibus instructus esse debet.

Munus vero optimi ciuis, est magistratui obtemperare, leges seruare, religionem colere, pacem inter ciues atq; concordiam retinere, & publica officia domi forisque recte & apte exequi ad ciuitatis utilitatem.

Vnde in vna quaque Rep. praeclari ciues habentur, qui bene imperare & parere possunt.

Diuerfam quodammodo esse virtutem boni viri & omni ex parte boni ciuis; simpliciter vero eandem. Cap. XI.



ROBI viri & quodammodo boni ciuis omnino eadem virtus censenda non est: nam, cū varie sint Rerump. formae, vna consimilis omnium ciuium, virtus esse non potest; siquidem ciuium virtus ad cuiusq; Reip. peculiarem administrationem referenda est atq; accommodanda.

Præsertim, cum boni ciues aliqua parte illi etiam habeantur, qui solertia atque civili prudentia insita a natura, vsuq; comparata præstantes; optime in male constituta Rep. versantur, tametsi virtutem non sint affecuti, ex qua solum viri boni proprie nominantur.

Neque vero cuncti vna eademq; virtute præditi esse possunt, nisi etiam sint ciues vniuersi similes omnino inter se; quod fieri in vnaquaq; Rep. nefas est: ciuitas enim ex plurib. personis, dissimilibusq; rebus, partibus, & muneribus a ciuib. aptis administrandis constituitur.

Ceterum virtus simpliciter boni ciuis, qui in bene constituta Rep. ex legum salutarium præscripto magistratum gerit, eadem simpliciter est ac boni viri, & non nisi ratione vir bonus ab optimo ciue discrepat; utrique enim solida ac germana virtus proposita est, quā ambo omnibus in rebus honestis actionibus

nibus adipisci conantur.

Quoniam vero demonstratum est eandem simpliciter boni viri cuiusq; optimæ Reip. esse virtutem; profecto eadem ratione, iisdemq; rebus vir & ciuis simpliciter bonus efficitur, quibus regalis potestas, aut optimatum, & populorum optimorum ciuitas constituitur, atque perficitur.

De plebe. Cap. XII.



LEPS, est infimorum hominum Urbem salutis causa inhabitantium, & Reip. legibus subiectorum, in vitæ cōmunitate congregata multitudo.

Cuius præcipua munera, sunt legibus & magistratibus parere, timere, honore afficere, antiquissimamque habere patriæ & ciuitatis salutem.

Plebis autem partes, sunt quattuor ceteris præstantiores & pacis præsertim tempore necessaria, agricolæ, artifices, mercatores, & mercenarij.

Totidemque sunt ad bellum utiles, equites, grauis armaturæ milites, levis armaturæ pedites seu ferentarij, & nautici.

Cum enim duo genera præliorum sint, terrestre, & nauale; terrestre eget equitatu & peditatu; peditatus autem, vel est grauis, vel levis armaturæ: Naualis vero expeditio requirit plures nauticarum rerum peritos.

Finis Libri Tertij.



M. ANTONII
BRAGADENI.
PATRICII VENETI,
DE HOMINIS FELICITATE
Liber Quartus.

DE DIVISIONE, ET GENERIBVS RERVMP.
ac primum

Quot, & quæ sint imperiorum genera, vel Rerump.
formæ. Cap. I.



QUONIAM Resp. est ordo multorū Vr-
bem inhabitantium, & plurimū in com-
muni cœtu legibus sociatorū multitudo:
pro dissimili ordine, varioque statu ho-
minum, qui ad Remp. constituendam con-
spirant; variæ quoque Rerump. formæ,
& dissimiles administrationes existunt.
Harum autem quædam simplices ac primæ sunt; quædam
hominum arbitratu ex simplicibus permixtæ.

Simplices, omnino tres numero sunt optimæ & rectæ, Re-
gnum, Optimatum status, & Resp. popularis legibus tempera-
ta: totidem item prauæ & rectarum conuersiones Tyrannis,
Paucorum factio, & Popularis potestas sine legibus.

Neceffe est enim in ciuitatibus vnum esse, penes quem sum-
mum sit imperium, vel paucos, vel certe multos. Si vnus iure
legitimo rerum potiatur, publicæq; utilitatis causa præsit;
Rex regaleque imperium appellatur: quod si vi & iniuste is
teneat

teneat principatum, omnia ad suam utilitatem rapiens; Tyrannus tyrannicumque imperium dicitur: si vero pauci virtute præstantes ad communem populorum salutem, imperium dirigunt; ij optimates & optimorum potestas nuncupatur: cū autem ij suis commodis seruiunt; pauci potentes & paucorū locupletum factio exoritur: denique si multi optimis legibus imperant, & id quod optimum est ciuitati procurant; existit ea, quæ communi Reip. nomine honestatur: si vero pauperum commodis consulunt, & bonum commune non spectant; sed sine legibus pro libidine administrant, popularis potestas efficitur.

Harum, tres imperiorum formæ Regnum, Aristocratia & legitima Resp. cum bonæ & iustæ sint, vere ciuitatis & Reip. nomen tenent; reliquæ vero tres prauæ, sunt potius degeneraciones & corruptelæ administrandi, & verbo, non re ciuitates ac Resp. nuncupantur.

Miste autem Resp., pro varia ex simplicium permistione, variæ & multiplices existunt.

De optimo vnius dominatu, vel de Monarchia, & Regno. Cap. II.



PTIMVS vnius dominatus, in duas imperandi formas distinguitur, in Monarchiam, & Regnum: qui enim totius est Orbis terrarum dominus, moderator, & arbiter; is Monarcha, eiusq; dominatus Monarchia proprie nuncupatur: qui vero summa quidem potestate præstat, sed in una vel pluribus tantum certis ac definitis ciuitatibus; is Rex uel Princeps, eius uero status & administratio, Regnum & Principatus appellatur; sed utriusque est eadem pene ratio; quare de Regno potissimum uerba faciemus.

Regnum, seu regia potestas, est rectum vnius iuste regentis populos libere obtemperantes, initio fruendæ iustitiæ & salutis causâ a multitudine institutum imperium:

Quod

Quod suapte natura longe omnium optimum ac præstantissimum existimatur: est enim diuini, ac naturalis imperij simulacrum. Nam, quemadmodum unius præpot. Dei providentia, omnis Mundus administratur, & diei unicum Solem, nocti uero Lunam, cunctisq; congregabilibus animantibus regem unum præesse cernimus: ita consentaneum est unum summum atque præstantem inter homines obtinere principatum.

Hæc autem procuratio, cum præclara est & salutaris; tum diuturna esset, si in demortui Regis optimi locum, alius æque probus ac uirtute præstans sufficeretur: sed quoniam optimo Regi alius improbus plerunque succedit; propterea in tyrannidem aliquando deflectit.

Optimus autem Rex, est uir bonus ac princeps, iure civili constitutus, qui publicis commodis consulit, & subiectos populos apte ad summam felicitatem gubernat.

Eius finis propositus, est ciues uirtutibus ad felicitatem perducere: Munus uero, est ciuium communi saluti atque utilitatibus studere, & accommodate ad eorum beatam uitam administrare.

Subiecti ciues, sunt liberi homines iuris & uitæ communione sociati, unius imperantis salutaria iussa libere capeßcentes, & uirtute atque ratione administrati.

Multitudo uero, est id populi genus, quod suapte natura accommodatum est ad imperium hominis uirtute præstantis æquo animo perferendum.

Est autem regnum uetustius & omnium primum constitutum imperium; cum enim initio, quo homines mutuis officijs uitam degere in communi societate caperunt, quisque proprijs commodis seruiret, publicis uero nemo consuleret, & tenuiores propter imbecillitatem a potentioribus circumuenti præmerentur: ad unum probata uirtutis atque iustitiæ confugerunt, eumque Regem, vel potius curatorem, & suarum controuersiarum arbitrum delegerunt; ut communi utilitati prospiceret, & opibus inferiores a locupletum ui atque iniurijs tueretur,

retur, eoque duce suum quisque tenere, & suo iure pacate frui possit.

De tyrannide, vel prauo vnus imperio.

Cap. III.



TYRANNIS, est regie potestatis deprauatio, vel iniustus & vi acquisitus vnus pro libidine ac priuata utilitatis causa populis veluti seruis imperantis dominatus.

Qui prauus atque iniquus & non naturalis est, cum a recta imperandi ratione sit quadam aberratio, nec ciuium consensione, aut iure aliquo ciuili; sed fraude, vi, ac repugnante natura constitutus sit.

Quo sit, ut maxima quoque huius imperij vis, diuturna esse non possit: qui enim vi oppressos imperio coercent, cum omnium ciuium odium contra se concitarint; eorum vitam omni ex parte oppugnatam esse; eorumque ceruicibus mortem perpetuo imminere perspicuum est.

Tyrannis autem nomine intelligimus vnum summum & iniustum dominum vi in ciuitate effectum, qui spretis diuinis, gentium, & naturae legibus, liberis hominibus imperat ut seruis, & alienis opibus ut suis ad libidinem & propriam utilitatem abutitur.

Ei subiecti populi, sunt homines quasi serui, qui vi imperio obstricti, nolentes atque inuiti parere coguntur.

Tyrannis origo, tum ab occupatione imperij vi & fraude oppressi; tum a regie potestatis conuersione & degeneratione existit.

Cum enim nihil difficilius sit, quam recte imperare, & summum imperium homines plerumque efferatos efficiat, maximaque præbeat inuitamenta & opportunitates ad explendas cupiditates: principio reges vehementi quadam incitatione inflammati rei concupita adipiscende, paulatim a vir-

H tute

tute & probitate defiscere, & vniuersorum utilitatem negligere proprijsque commodis tantum consulere ceperunt; ita qui ante reges erant, & optimi publicæ salutis custodes habebantur, lucri cupiditate atque libidine tyranni effecti sunt.

De Aristocratia, vel optimatum imperio.

Cap. IV.



OPTIMATVM potestas, est paucorum ciuium optimorum in subiectos liberos populos, ciuium consensu delatum, & publicæ salutis causa, virtute moderatum imperium: vnā enim virtutem atque honestatem qui in hac Rep. rerum potiuntur, semper intueri, & eo omnia dirigere debent.

Quamobrem hac administratio, si bene constituta sit, optima (vt nomen ipsum indicat,) & satis firma ac stabilis est ad diuturnitatem.

Hæc enim Resp., optimorum virorum summo consilio, atq; prudentia administratur, & indiciorum æquitate ciuium opes conseruantur, parique iure publicæ munera ciuibz spectat. & virtutis distribuuntur.

Optimates, sunt pauci summi atque optimi ciues Reip. administratores, populorum approbatione constituti; quibus virtus & communis utilitas proposita est.

Optimos autem ciues intelligimus eos, qui nobilitate clari sunt, ciuilibzq; administrationis prudentes, & potissimum virtute facile primi.

Eorum potestati subiecta est ea multitudo, quæ suapte natura apta est ad ferendum multorum imperantium dominatum, & quæ libere parere regi quæ vult ab ijs, qui sunt virtute præstantes.

Optimatum uero potestatis origo, a Regni euersione, Tyrannidisque restinctione deducta est: cum enim multitudo imperij oppresseretur, nec suo iure libere frui posset; exactis regibus,

bus, tyrannisque expulsis, ex omnibus ciuibus paucos uirtute principes communis salutis caussa delegit, eosque ciuitatis administratores, libertatis custodes, & cuiusque rerum conseruatores constituit.

De Oligarchia, vel paucorum factione.

Cap. V.



QUAE AD MODUM optimatum administratio maxime salutaris est, atque praecleara, si ordine ac iure constituta sit: ita nihil immanius esse potest, si in paucorum diuitum factionem deflectat; nam tyrannide eo deterior existit, quo in illa unus tantum subiectos imperij ui coercet; in hac uero plures tyranni potentes ac saeuientes in pauperum perniciem conspirant.

Vnde, cum iniusta sit huiusmodi potestas & praeter naturam, nec utilis, aut laudabilis esse potest, nec admodum diuturna.

Est autem paucorum potestas, optimatum status deprauatio, ac iniustum paucorum nobilium & locupletum imperium, qui suis tantum commodis seruientes, populis tamquam seruis suo arbitratu atque libidine dominantur.

Hanc uero perniciosam paucorum potestatem, hominum improbitas, lucri cupiditas, atque libido, & incontinentia inuexit; uel optimates inducere, ubi deprauari ceperunt.

Pauci enim atque admodum pauci regno potiti, honoribusque & gloria amplificati, cum statum & aquabilem uitae cursum diutius tenere possunt.

De Politia, vel Timocratia, seu Rep. speciatim.

Cap. VI.



POLITIA, que communi omnium Rerump. nomine Resp. nuncupatur, rectus est dominatus uniuersorum, vel populi maioris partis, que ciuitatis administrationi optimis legibus praest, & omnia confert ad communem utilitatem.

Nam, sicuti in Aristocratia pauci optimi, vel ciuium minor pars, summum Reip. imperium tenet: ita in hac legitima multorum administratione, uniuersi, aut certe maior pars omnium ciuium in unum quasi corpus collecta, supremam obtinet potestatem:

Siquidem multitudinis nutu atque imperio leges feruntur & abrogantur, iura describuntur ac stabiliuntur, magistratus omnes deliguntur, eius consilio publica negotia geruntur, omnisque Resp. gubernatur.

Quapropter hac administratio optima & laudabilis est, si populo ac multitudini temperamentum adhibeatur, quo tenuiores cum principibus aequari se putent, in quo uno totius Reip. solus posita est.

Id autem est (vnde etiam nomen inuenit) *isocrazia* id est iuris aequalitas; qua ex omni populo magistratus ducantur, omnibusque pari ratione mandentur, & suum unicuique iudiciorum aequitate tribuatur, ut nec tenuioribus imbecillitas, & potentiorum vis & gratia, nec opulentioribus odium & inuidia ad sua tuenda sit impedimento.

Huic Reip. congruit id populi genus, quod ad rem bellicam aptum sit suapte natura, & parere vicissimque imperare possit ex legibus & aequitate.

Finis & fundamentum popularis huius status, est publica utilitas & libertas; ius enim liberi populi, quod multitudo maxime querit atque exoptat, est vicissim parere atque praesse, & posse.

Et posse viuere ut velit, vi aut iure non repugnante.

Vnde huius studio impulsu populi, post exactos paucos ciues locupletes & principes, qui malis domesticis impediti, inter se digladiabantur, & eorum tyrannico imperio deposito, quo nimium premebantur; omnem optimatum & paucorum potentium statum in Remp. popularem legibus moderatam permutarunt.

De Democratia, seu populari statu sine legibus.

Cap. VII.



POPULARIS potestas, est legitima Reip. mutatio in prauum nullisque salutaribus legibus temperatum imperium quamplurimum tenuiorum, qui priuatam utilitatem atque licentiam spectantes, pro libidine dominantur.

Est enim pestifera suapte natura, & admodum parum diuturna gubernatio: quippe quæ in seditione & ad seditionem nata est, plebsque imperita & concitata sine legibus dominatur, singulique in ea proprijs commodis & opibus augendis inferunt; præterea omnes æqualiter præesse ac imperare volunt, non pro dignitate, sed pro cuiusque numero ac multitudine, omniaque effrenata licentia pessundant.

Et quoniam popularis & paucorum administrationes, inter se contrarie esse videntur; ut paucorum potestas, genere, diuinijs, & disciplina definitur: ita in populari statu, generis ignobilitas, paupertas, & illiberales artes maxime cernuntur.

Huius vero popularis potestatis primus ortus, a seditione, plebisque secessionibus inter arma ciuium procreatus est.



ACTENVS de simplicibus imperijs dictum est, nunc de mistis aliquid ordine subiiciendum videtur; nam quemadmodum in hisce inferioribus rebus perraro simplices rerū formæ, sed plerumque concreta cernuntur: ita pauca, admodumque pauca simplicia imperia & administrandi rationes inueniuntur; sed plerumque permista ad ciuium salutem & Reip. diuturnitatem sunt constituta.

Mista Resp., est ex simplicium administrationum diuersa permissione temperatum imperium, quod varium omnino ac multiplex esse potest;

Verum vniuerse mista Resp., ex sinibus bonorum ac malorum, sicuti simplices, duorum sunt generum, alie bonæ & recte, quæ ex bene constitutis Rebus componuntur, ut Regno, Optimatum potestate, & Politia: alie prauæ, quæ ex contrarijs ac deprauatis constantur, ut tyrannide, paucorum factione, & statu populari.

Bonæ administrationes varie, multisque modis connectuntur pro varia optimarum simplicium Rerump. temperatione; ut ex regali & optimatum administratione permistum imperium, ut ex regio & populari, ut denique ex regio, optimatum, & legitimo populorum imperio complexa Resp.: eademque est ratio permissionis contrariarum administrationum.

Cum autem dicimus Remp. permisceri ex regno, ceterisque imperijs; non ita intelligendum est, quasi ex eodem omnino summo & integro Regis & reliquorum imperio coalescat: cum enim regia maiestas & summum imperium indiuiduum sit, distinguere & comisceri non potest; sed ex Principe componi, qui, tametsi non obtineat summam potestatem; tamen Regis personam sustinet, & eius quodammodo remissam, ac temperatam auctori-

authoritatem habet; pariterque ex optimatum & legitime popularis temperato Reip. statu; ut ex duorum vel trium simplicium imperiorum temperatione, (quod etiā in naturali permissione cernitur) summum existit imperium, & una exoritur suis omnibus partibus absoluta Resp.

Quænam sit præstantior Respub.

Cap. IX.



Q UONIAM dicimus esse tria genera Rerump., que recte constituta sunt; simpliciter ac suapte natura ex his regium imperium ceteris præferendum videtur.

Est enim optimo ac præstantissimo imperio præpor. Dei simillimum, planeque diuinum, expressamque provida Nature continet imitationem:

Attamen pro hominum, qui in civitate versantur, varietate, statu, dissimiliq; natura, institutione, & artibus, pro Urbis situ, celi clementia, regionis fertilitate, temporumq; ratione; varia varijs locis Rerump. genera congruere necesse est; ut personis, locis, atque temporibus imperij forma accommodata sit.

Verum uniuersæ ex tribus rectis simplicibusque Rebusp., optima ea videtur esse oportere, quæ ab optimis administratur, & Aristocratia dicitur.

Ex mixtis vero ea optima censetur atque præstantior, quæ ex tribus optimis imperijs regis, optimorum, & politie temperata sit; quam Polibius, & ante ipsum Herodotus antiquitatis parens induxit, & Stoici ac Cicero Zenonem secuti, ceteris omnibus anteponunt.

Atque huiusmodi est Venetorum Resp., quæ singulari Dei munere mihi parens & patria data est, cum Princeps vnus sublimis

sublimis & virtute præstans summum teneat in ciuitate principatum, ac regiam maiestatem præ se ferat; pauci, optimiq; Senatores consilio atque prudentia insignes, Optimatum auctoritatem obtineant; quamplurimi vero patricij ordinis, probiq; cines in comitijs collecti, legitimam popularium potestatem, ac Politiam constituere videantur.

Finis Libri Quarti.



M. ANTONII BRAGADENI.

PATRICII VENETI.

DE HOMINIS FELICITATE

Liber Quinctus.

DE PARTIBVS, ET CAVSSIS RERVM P.

ac primum

De Magistratibus vniuerse. Cap. I.



*V*M lex, quæ est anima, vita, & con-
formatio optima cuiusq; Reip., genera-
tim feratur a legislatore, atque ipsa per
se viribus destituta sit, singularumque
rerum euentus, qui omnes comprehendi
non possunt, legibus longe plures existât;
parum emolumenti Reip. allatura erat,
nisi Magistratus accessisset, qui legem vniuerse loquentem,
ad singulos rerum exitus accommodaret, & pro rebus, tempo-
re, locis atque personis moderaretur: deinde ei vim, auctori-
tatem, spiritumq; tribueret exequendo; vere enim ac sapienter
dictum est, magistratum esse legem loquentem; legem autem
mutum magistratum.

Magistratus autem proprie & vniuerse, est publicum offi-
cium constituendi, conseruandiq; imperij causa, vni vel plu-
ribus ciuibus iniunctum, quibus a legislatore comissa est non-
nullis de rebus consultandi, vel iudicandi, vel imperandi
potestas.

Pro cuiusq; vero simplicis, misteq; Reip. institutis & ad ministrandi ratione, & pro magistratuum ac munerum varietate, vel omnes, vel aliqui ciues creant magistratus, & ex omnibus ciuibus omnes magistratus, vel quidam ex quibusdam, quidam ex omnibus deliguntur.

Modus autem creandorum magistratuum triplex est, suffragijs, sorte, & utroque, id est sortitione atq; suffragio.

Sed pro magistratus magnitudine, vel paruitate & Reip. forma, interdum expedit, ut altero modo, interdum utroque magistratus mandentur.

Verum vniuerse in deligendis magistratibus, semper in vnaquaque praeclare constituta Rep. ciuium virtutis habenda est ratio: non enim census, atque diuitie, non generis nobilitas, non aura popularis ciues ad magistratus & honores; sed vna virtus in primis debet perducere.

Virtutem autem non intelligimus tantum vitæ ac morum integritatem; sed cum ea coniunctam ciuium facultatem & habilitatem quandam ad commode & utiliter magistratum gerendam.

Quæ tribus rebus præcipue continetur, ut scilicet ciues sciant, possint, & libenti animo velint suo fungi munere: quæ omnia, tametsi non facile est inuenire in vno ciue copulata; in quibus tamen hæc inchoata & magis inesse videntur, ijs iure optimo magistratus deferendi sunt.

Quare, ut paucis complectar, illi potissimum præficiantur, qui virtute in primis ornat singulis muneribus obeundis quæ maxime apti sint, qui legum morumq; ciuitatis scientiam teneant, & longo rerum usu periti sint, omnibusq; in rebus antiquissimam habeant Reip. salutem & utilitatem.

Ceterum pro loci, magistratusq; ratione, penes vnum magistratum interdum multarum rerum cura; interdum plurium; interdum paucarum auctoritas & potestas esse debet: nam alibi expedit magistratus esse magnos; alibi vero paruos.

Sed præstat vniuerse temperatam rerum maximarum potestatem.

testatem, & multis, quam amplam, & unitantum deferri; ne ij ui magistratus abutentes in Remp. conspirent.

Quot autem, & quam multi magistratus in Rep. constituen- di sint: præterea an magistratus breui temporis spacio coar- etari, an diuturni, an perpetui esse debeant, simpliciter defini- ri non potest.

Nam in magnis ciuitatibus fieri potest, & debet, ut unus magistratus uni rei & officio præficiatur, ex multisq; ciuib; constituatur: quoniam, cum multi ciues sint, fieri potest, ut multi ad Remp. administrandam accedant; atque in ijs expe- dit, magistratus non esse admodum diuturnos; sed plerosque breui tempore distinctos, nec eosdem bis, aut sæpe eundem ge- rere magistratum.

In paruis autem ciuitatibus, unus magistratus multis mu- neribus præponatur, multiq; magistratus paucis ciuib; man- dentur, necesse est; siquidem propter ciuium paucitatem & penuriam, difficile est multos esse in magistratu, & nihil obstat quominus magistratus diuturniores sint, & bis, aut sæpius ijdẽ eodem magistratu fungantur: nam, cum iisdem fere magistra- tibus egeat parue ciuitates, ac magna, & ciues admodum pau- ci sint; qui his rursum successuri sint, nulli erunt.

Magistratus autem pro cuiusque imperij forma, plures, vel pauciores esse debent:

Sed vniuerse tria sunt genera, Senatus, Iudicia, & Magi- stratus speciatim: Senatus, præcipuus est magistratus, quoniã leges condit, in eoque totius Reip. forma cernitur: Iudicia & magistratus, non sunt ita præcipui, sed ab illo principali pen- dent, & vim ac potestatem accipiunt; atq; hæc tria magistra- tuum genera tres Reipub. partes statuuntur, de quibus ordine differemus.



MNES Resp., quæ recte constituta sunt, non ex una, sed ex multis partibus constant: tres autem sunt præcipue partes ad civitatem bene administrandam omnino necessarie, Senatus, Iudicia, & Magistratus speciatim; quæ si recte constituta sunt, optimum, ac diuturnum fore civitatis statum, necesse est: contra vero ijs male descriptis & vitiatis, Remp. non longe ab interitu abesse, credendum est; Quapropter earum cuiusque, sapienti Rerump. & legum conditori summa habenda est ratio.

Senatus uniuerse, præcipua est Reip. pars, quæ in consultatione, et consilij capiendi deliberatione de communibus rebus occupata est, ut de bello & pace ineunda, vel dirimenda, de federibus feriendis, de iungenda societate, de inducijs paciscendis, de condendis legibus vel abrogandis, & alijs eius generis.

Huiusmodi vero consultandi & deliberandi facultatem, quæ primum habet in Rep. dominatum, & summum est prudentie civilis officium; præstat non omnibus, sed aliquibus de nonnullis rebus mandari, & quidem suffragijs potius, quam sortitione.

Iam Senatus duplex est, unus consultandi, alter deliberandi: prior curia consularis, vel consultorum collegium dicitur, quod est publicum officium ex viris sapientissimis atque consulis constitutum, qui communium rerum gerendarum, καὶ προβουλευματα, quæ antegressas consultationes appellare licet, instituunt, & quasi præiudicia faciunt; quæ ad Senatum postea deferuntur, & ab ijs, quorum est consilij capiendi deliberatio, vel tamquam salutaria approbantur & inbentur, vel tamquam inutilia & perniciofa reprobantur atq; rejiciuntur.

Posterior proprie Senatus nuncupatur, qui publicus est conventus plurium prudentissimorum virorum, qui suffragijs, vel

vel legitima alia ratione declarati, in excutiendo consilio, pendendisq; sententijs a consultoribus relatis, & in deliberando versantur.

Qui in consultatione occupantur, Græcis *προβουλοι*, Latini consules, & ut ita dicam præconsultores dicuntur, vel *νομοφύλακες*, id est legum custodes; sunt enim ij viri consulti, plerunq; suffragijs delecti, ut legibus præsent; quorum peculiare munus, est de publicis rebus gerendis sententiam ferre: postea, quæ prius in curia consultando decreuerint, ad Senatum deferre, & ea, si opus sit, in concione agitare.

Illi vero, quorum est communis consilij capiendi potestas, proprie Senatores appellantur, eorumq; munus potissimum ceruitur in apte ad ciuitatis vtilitatem deliberando de communibus rebus, quibus vniuerse Reip. salus continetur.

Atque hæc sane deliberandi institutio maximum Reip. affert emolumentum; ita enim senatorius ordo fit consilij particeps, & prudentius ac salutaris P. C. de præconsultis deliberant, nec abrogare possunt Reip. leges ac instituta:

Siquidem hac ratione necessarium est, vel eadem Senatores, quæ a consultoribus & legum custodibus ad se relata fuerint, sciscere ac iubere; vel nihil alterutri delatæ sententiæ, & in concione agitata contrarium posse decernere.

De Iudicijs.

Cap. III.



QVONIAM, dum singuli ius suum tueri & ab aliorum bonis sua internoscere volunt; sæpenumero inter eos controuersie nascuntur, & nefaria scelera consequuntur: propterea, ne excrecentibus controuersiis, inimicitie ac simultates exorirentur, & ciues vindictæ cupiditate ducti, armis & cede Remp. exagitarent; sed tutus a vi atque iniuria quisque in civili societate uiueret: iudicia & indices necessario instituti sunt; qui munus litium dirimendarum obirent, suum cuiq; tribuerent, publici criminum

uindices

uindices essent, & ciues beneuolentia atque concordia reuererent.

Iudicia, sunt præcipua Reip. pars, & publica communis utilitatis causa uni, uel pluribus data suffragijs, uel alio modo, de priuatorum publicisque controuersis ex legum & æquitatis præscripto ius dicendi potestas.

Iudiciorum duo sunt genera, quedam priuata, quedam publica, priuata, sunt publicum munus uni uel pluribus delatum suffragijs alioque modo, qui priuatorum ciuiles actiones, cuiusq; & uniuersorum utilitatis causa cognoscunt, & iuridicundo definiunt:

Publica, sunt publicum officium ob ciuitatis utilitatem uni uel pluribus delectis ciuibus commissum, qui crimina contra Remp. & singulos perpetrata exquirunt, iudicant, & capitis uel alio supplicio ex legum & iuris præcepto coercent.

Quæ autem præcipue in iudicijs disceptationes uenire solent, sunt actiones ciuiles, & capitales, quæ petitione & recusatione, uel accusatione & defensione potissimum agitantur, coram ijs, qui præsumt iuridicundo de capite ac fortunis.

Et quoniam in iudicijs maximum omnino momentum possum est ad totius Reip. moderationem & felicitatem: danda est opera diligenter, ut boni uiri potissimum eligantur, quorum probitas atque prudentia iamdiu multis in rebus spectata sit, quique suæ ciuitatis legum scientiam compararint & didicerint consuetudinem iudicandi, uel certe ij, quos longus rerum usus iudiciorum peritos ac prudentes effecerit.

Quapropter adolescentes, qui rerum usu & cognitione parum ualent, & animi perturbationibus sæpe concitantur, iudicandi munus recte & pro dignitate obire non possunt.

Eos autem, qui iuridicundo præfuturi sunt, præcipuam operam nauare oportet, ut iuris æquabilitate suum cuiq; tribuât, & ne tenuiores fraude circumuentos, potentiorum ui opprimi patiantur; neque in diuites odio, maleuolentia, & inuidia ducantur; sed mente, ratione, & æqualitate.

Quare

Quare iudices omni cupiditate, & animi perturbatione spoliati sint; ne gratia, & odio, aliove animi motu a vero facile abducantur.

De Magistratibus speciatim. Cap. IV.



EORVM, qui ciuitatis administrationi præsunt, quidam in consilio dando & de communibus rebus deliberando, vt Senatores: quidam in priuatorum controuersijs dirimendis, delictisq; puniendis, vt Iudices; quidam postremo in Vrbe suo imperio moderanda & regione custodienda versantur, qui Magistratus speciatim dicuntur: quare cum de senatoribus & iudicibus hæcenus dixerimus, nunc restat vt aliqua de magistratibus adijciamus.

Magistratus speciatim, est Reip. pars & publicum officium uni vel pluribus ciuibus commissum, quibus urbanorum prouincialiumque negotiorum moderatio, maximeque imperandi potestas data est:

Magistratus enim maxime proprium est imperare, idque magis vim eius & auctoritatem indicat.

Munus magistratus, præcipue in eo positum est, vt iubeat quæ lege præscribuntur, uetitaque prohibeat, ac suo imperio leges exequatur.

Magistratus variae sunt species, munera, & partes; quæ, cum satis longam tractationem requirant, de eis nunc dicere omitte-

mus.

LIBER
DE CAUSSIS RERVM P.

ac primum de causis constituentibus

Remp. Cap. V.



MNES Rerump. causse, tripliciter diuiduntur, quadam enim sunt constituentes Remp., quadam mutantes, quadam postremo conseruantes.

Quæ Remp. optime constituunt, duo præcipue sunt, ciuium & opum mediocritas, & leges.

Mediocritas, est ciuium nec admodum locupletum, nec valde egentium; sed opum moderata quadam abundantia affluentium temperatio, in qua optimus Reip. status positus est:

Cum enim ciuitas omnis ex tribus ciuium generibus constet, ex valde opulentis, ex valde egentibus, & ex mediocribus, & id quod mediocre est & medium; omnium consensione optimum sit: profecto mediocrem rerum externarum abundantiam ciuibus optimam esse, & præclare ciuitatem ex ciuium mediocrium temperatione constitui, necesse est.

Ita enim cines optimam vitam viuunt, & legibus atq; rationi facillime obtemperant, et ex quam maxime paribus, quibus Resp. constare vult, ciuitas continetur: nam inter cines modo atque opum mediocritate temperatos, nulla inuidia existit, nulla occultantur insidiæ, nulla denique exoritur cupiditas alieni.

Legibus autem præcipue fundantur, stabiliunturq; ciuitates. Sed optimo legislatori summopere enitendum est, ut bonis aptisq; legibus initio ciuitas constituatur: quibus enim legibus initio Resp. temperata est, iisdem augetur, nititur, & omni tempore conseruatur.

Quare conditor legum atque Reip. ciuili scientia, & legum ferendarum peritia instructus esse debet: deinde illi cognoscenda est ea Resp. & administrandi ratio, quæ cuique ciuitati, locis, personis atque temporibus aptissima sit: postea tenenda sunt

sunt leges optima, & quæ ijs maxime congruant, qui in ciuitatem venerunt; sunt enim leges, quæ feruntur ad Remp. accommodande, non ad leges Resp.; siquidem eadem leges omnibus Rebusp. utiles esse non possunt, sed de his postea latius integro libro differemus.

DE CA VSSIS MVTANTIBVS, SEV De conuersionibus Rerump. Cap. VI.



LORENS & moderatus Reip. status, cum ob intestina bella; tum ob rerum humanarum varietatem instabilemque fortunam; raro vel nunquam verius diuturno tempore teneri, ac permanere potest: Quare quæ aliquandiu floruerunt Resp., tandem aliquando intereant, vel immutentur, necesse est.

Omniū autem Rerump. obitus atque mutatio duplex est, una naturalis, cum Resp. vetustate & senectute confecta, suapte grauitate occidunt; vel sponte nulla armorum vi se se alterius imperio dedunt atque subiiciunt: altera non naturalis, quæ duobus modis contingit, vel diuina vi, cum Dei iussu permissuue maxima quoque imperia momento ruunt & collabuntur, seu immutantur; vel humana vi ac necessitate, quæ extranea est, vel intestina; extranea, cum ciuitates & vrbes hostium armis obsesse & coactæ, impetu & vi capiuntur; intestina cernitur in Rebusp., quæ popularibus morbis, & armis civilibus ac seditionibus infestantur.

Omniū autem mutationum Rerump. tres sunt præcipui modi, conuersio, intensio vel remissio, & immutatio. Conuersio, est vnius Reip. in aliam formam genere diuersam mutatio, ut cum status popularis, in Remp., vel optimatum, vel vnius imperium vertitur, vel contra: Intensio, vel remissio, est cum idem Reip. status & constitutio retinetur, sed Reip. ratio augetur, vel imminuitur, veluti si Democratia fiat magis minusue popularis; Immutatio, est saluo atque retento institutæ

K Reip.

Reip. statu, alicuius Reip. partis variatio, ut si magistratus aliquis novus constituatur, aut vetus auferatur.

Ac uniuerse Resp., quæ mutationes patiuntur, interdum in meliorem statum; interdum in deterioremutantur. Nunc ad conuersionum causas transeamus; nobis enim hoc loco de conuersionibus tantum agere constitutum est.

DE CAUSSIS CONVERSIONVM, VEL De seditionibus Rerump. Cap. VII.



CONVERSIONVM omnium Rerump. præcipua causa seditio existimatur, quæ nihil aliud est, quam exitiosa ciuiliū discordiarum ex honoris lucrique; inæqualitate exorta, et æqualitatis cõstituenda causa a ciuibus exagitata cõcitatio.

Semper enim in omni Rep. ius æquabile quesitum est, omnesque ciues pares esse, & in omnium ciuiliū rerum communio- nem uenire uolunt: cum autem, non pro suo quisque iure, uel opi- nione tantum in Rep. obtinet, & minus se habere existimat; tum seditionibus ciuitatem exagitat.

Tria uero sunt ciuium genera, qui totidem ob causas, sedi- tionem in ciuitate solent inducere: locupletes & egentes, ob lu- cri æqualitatem: nobiles & plebei, ob honorum parilem distri- butionem; potentes & inferiores subiecti, ob æquabilem uim & libertatem.

Omnes enim in eo conueniunt, quod aserunt seruandam esse æqualitatem; tamen in eo discrepant, quod plebei, inopes, & inferiores æqualitatem libertate, & uita ac rerum communio- ne; opulenti uero diuitijs; nobiles generis nobilitate: potentes uero metiuntur:

Ita omnes aliquo iure nituntur, sed a iuris absoluti ueritate quamplurimum aberrant: nam obscuro loco nati, tennes, & subiecti, cum sint una in re pares, ut in libertate; omnium etiã publicorum munerum & commodorum æquales esse uolunt; nobiles

nobiles vero, locupletes, & potentes, cum sint una in re inaequales, ut diuitijs, nobilitate, & potentia; omnibus honoribus & commodis, maximeq; imperio excellere contendunt.

Sunt tamen boni, salutareq; ciues, qui cum virtute praesent & plurimum distent ab improbis inutilibusq; ciuibus, iustissime seditiones concitare possent: maxime enim rationi consentaneum est, horum causam tantum omnium simpliciter esse inaequalem ac meliorem, quod in quaque bene constituta Reip. seruetur; tamen seditiones aduersantur, quoniam ob eorum probitatem & integritatem, commune bonum proprijs commodis anteponunt.

Principia vero & causae efficientes, unde seditiones nascuntur, duorum sunt generum, quaedam internae, quaedam externae.

Internae, quae sunt communissima initia & irritamenta ciuiliū discordiarum, sunt dissimilitudo & inaequalitas honoris & lucri.

Dispar enim condicio & omnis dissimilitudo dissidium, dissidium discordias, discordiae simultates, simultates factionem, factio seditiones in Rep. parere consuevere: maximum autem dissidium est virtutis & vitij, diuitiarum & paupertatis, potentiae & imbecillitatis, & nobilitatis ac generis obscuritatis.

Honoris vero & libertatis inaequalitas duobus modis seditionem facere solet, primum quando ciues cernunt plurimos iniuria florere honoribus, unde ciues ad seditionem impellit alicuius nimia exuperantia potestatis, & auaritia atque improbitas: exuperantia quidem potestatis & incrementum iusto maius, cū aliqua ciuitatis pars supra alias praeter modum ac proportionem ornatur & augetur; vel unus inter ciues, aut plures potentia, gratia, diuitiarum & amicorum copijs plurimum valent, ut periculum sit, ne Remp. occupent atque euertant:

Auaritia vero atque improbitas, cum magistratus improbi sunt, & quaestui habent magistratū, atq; Remp.; vel quādo magistratus ijs deferuntur, qui suffragia largitionibus corrumpunt.

Deinde ciues seditionibus Remp. perturbant, quod se vel honoribus vacuos repelli ac iacere, vel iniuria affici vident; propterea metus, contemptus, contentio, & iniuria seditionis caussa esse solet.

Timor quidem & conscientia scelerum, quoniam, qui iniuriam fecerunt, scelerum suorum conscij, seditionem commouent in ciuitate & in res nouas conspirant, veriti ne dent pœnas peccatorum suorum; & qui imminentem vim metuent, tumultuantur, vt iniuriam propulsent priusquam vllum pariantur incommodum:

Contemptus, vt si aliqui nullam partem in publicis muneribus habeant, & neglecti ceteris ciuibus despicatui sint:

Contentio vero & iniuria, cum ciues hostili discordia diglantur, & contumelys, atque iniurijs afficiuntur.

Lucri vero & bonorum externorum inequalitas, cuiusmodi est secunda fortuna, & opulencia diuitum, & calamitas pauperum, seditiones inuehit in ciuitates; quoniam pauperes, qui egestate premuntur, ceteros ciues cernunt esse in summa bonorum affluentia.

Externa caussa sunt negligentia, parua occasiones, dissimilitudo nationum, locus & tempus; quæ vi aliena seditionem mutationemque Rerump. inducunt.

Negligētia, cum ciues incuria ad summos magistratus peruenire sinunt eos, qui præsentem Reip. statum non amant, & rebus nouis summopere student:

Parua occasiones, quoniam seditiones nō de re leui, sed ex re leui nascuntur; quæ plerunque initio latet atque contemnitur, & sensim serpit, atque ad extremum magna erumpit ciuitatis mutatio:

Dissimilitudo nationum, si aduena, & incolæ ex alijs ciuitatibus Reip. asciscantur:

Locus vero & tempus ciuitatibus seditionem afferunt, cū nec tempus opportunum, nec regionis situs, & loci natura sic munita & apta est, vt ibi una ciuitas instituitur.

De modis conuerſionum Rerump.

Cap. VIII.



VT *ATVR* Reip. ſtatus præcipue duobus modis, vi, & fraude; vi quidẽ ſeditioſi ciues Remp euertunt, cum iam inde ab initio, vel poſtea populis neceſſitatẽ aſſerunt, vt eum Reip. ſtatum, quem illi ſuo arbitratu ſtabiliunt, recipiant, & ſeruent; fraude vero, cum dolo malo ciues decipiunt, mox Remp. occupant.

Ceterum fraus duplex eſt, altera ſimplex, altera vi iuncta: Interdum enim Rerump. euerſores, vbi ciues fallacibus concluſunculis initio in fraudem egerunt, eorum conſenſu Reip. ſtatum immutant; poſtea ijs inuitis, vi Reip. principatum aſſumunt: interdum vero, cum initio perſuaſerint aliud utilius inducendum eſſe genus adminiſtrationis; poſt iſſdem etiam rationibus captioſis adductis uolentibus, & approbantibus, in ciuitate ſummum imperium obtinent.

DE CAVSSIS CONSERVANTIB. REMP. VEL

de optima partium adminiſtratione, & cautione adhibenda. Cap. IX.



*Q*UONIAM contraria curantur rebus contrarijs, & exitio ſalus contraria eſt; liquido apparet earundem rerum curatione, que interitum aſſerunt, ſaluam atque incolumen fore ciuitatem.

Quattuor autem præcipue ſunt, quibus Reſp. bene conſtituta ab interitu uindicatur & in optimo ſtatu ſeruat, Adminiſtratio partium, cautio diligens, ſeditionum reſtriçtio, & liberorum inſtitutio.

Primum igitur partium adminiſtratio nel præclara publicorum munerum func tio bene temperatis Rebuſſ. maximum procul

procul dubio ad ciuitates conseruandas adfert adiumentum.

Quare, cum primum sit magistratum creatio, tum eorum administratio: danda est opera diligenter, ne alicui fiat iniuria in distribuendis honoribus & commodis; sed inter omnes equalitas quedam seruetur; deliganturq; in primis optimi ciues, aptiq; muneribus publicis, qui præclare gerant magistratum, nec quæstui habeant Remp., providendumq; maxime est, ne quis supra modum honoribus ornetur & augeatur, ut iustā ciuitatis membrorum & partium proportionem excedat: præstat enim exiguos & aliquo temporis intervallo distinctos, vel etiam breui tempore definitos honores, quam celeriter omnes, magnosq; tribuere: qđ si forte aliquis oībus honoribus p̄ ceteris auctus & cumulatus sit, non sunt statim vniuersi, sed sensim ac paulatim auferendi, semperque ea ciuium pars, quæ Remp. saluam, eoq; in statu permanere vult, adaugenda est, ei; res gerendæ & magistratus deferendi sunt; contraria seditiosorum, qui res nouas moliuntur, deprimenda.

Sed in administratione partium enitendum est, ut Senatores mala & pericula imminencia longe prospiciant, & salutare aliquod remedium statim adhibeant: Iudices caput a vi & insidijs tueantur, puniantq; facinorosos, & priuatorum fortunas ab iniuria potentiorum defendant, & hereditates non donationibus, sed cognationibus deferant; Magistratus autem utiliter administrent omnes Reip. partēs, & amice ac humaniter cum multitudine se se gerant.

Malorum autem prouisio & statim adhibita cautio, præclare constitutam Remp. stabilire potest: ea vero tribus in rebus præcipue cernitur.

Nam primum summopere cauendum est, nihil quicquam, ne minimum quidem contra leges fiat, & si qua res parua violata conspiciatur, statim præsidium adhibeatur: legum enim subobscura violatio principio nos fugit, tum pedetentim repit, & paulatim progrediens vires capit, postremo Rerump. mutationem atque euerisionem inducit:

Deinde

Deinde curandum est, ne ciues simulatis legibus decipiantur, & fallacijs, ac fraudis commentis ab opulentijs, potiundi cupiditate excogitatis, inducantur, vt presentem Reip. statum immutent:

Postremo maxime prouidendum est atque impediendum, ne quis supra modum præstet clientellis, potentia, & viribus, ac longe superet alios amicorū, & pecuniarum copijs; ne in Remp. insidias machinetur.

De seditionum restinctione, & optima liberorum institutione. Cap. X.



QUEMADMODVM seditiones sunt præcipue in causa, cur Resp. funditus evertantur, & ciuium male instituta, & a pueris suscepta vitæ rationes, maximas plerunq; mutationes afferunt ciuitatibus; ita illis restinctis, ijs vero bene institutis, statum Reip. fir- mum ac diuturnum fore perspicuum est.

Dirimuntur autem seditiones, si antequam nascantur, longe prospiciantur; quare principijs, lenibusq; rebus, ex quibus solent existere, obstandum est; non enim parua de re, sed ex paruis erumpunt: post de magnis ciues tumultuantur, & cum a principio error existat, principiumq; totius dimidium sit; paruum etiam peccatum, in quod quis initio incidit, in alias etiam partes propagatur.

Parua quoque ciuium, præcipue potentiorum, contentiones atque discordiæ dirimendæ sunt: nam parua etiam simultates tum vel maxime vires capiunt, cum inter eos oriuntur, qui summam habent in Rep. potestatem: nobilium enim ac principum ciuium discordiæ secum multitudinem trahunt, & ciuitatem vniuersam seditionibus insciunt; legibusq; cauendum est, ne ciues inter se odia exerceant, pœnisq; persequendi sunt illi, qui discordijs operam nauant.


Quod si iam orta sint seditiones, statim remedium obijciendum

dum est, & ne longius serpent, cautio adhibenda est; Nam facile morbi recentes curantur, inueterati plerumque interitum afferunt.

Quare, qui Remp. administrant, omni studio curare debēt, ut seditiones quamprimum sedentur: iisdemq; maxime conandū est principum præsertim ac nobilium, qui præsent multumq; possunt, odia & discordias initio dissoluere, & eos conciliare, populosq; concitatos sedare, & amore ac beneuolentia pacatos atque concordēs retinere.

Maximum autem adiumentum ad Remp. conseruandam accedit, si ciues optime a pueris apteq; ad eius ciuitatis instituta educentur, & ab ineunte ætate artibus liberalibus imbuantur, ac informantur ad ciuilem disciplinam, ut præclare & utiliter imperare, vicissimq; sine difficultate parere, & legibus obtemperare possint.

Finis Libri Quinti.



41

M. ANTONII
BRAGADENI.

PATRICII VENETI,
DE HOMINIS FELICITATE

Liber Sextus:

IN QVO
DE LEGIBVS DISPVTATVR.



De legum necessitate, & vtilitate. Cap. I.

IOSTQVAM supremus huius pulcher-
rimi Theatri Orbis terrarum fabricator
& auctor, hominem quasi epilogum re-
rum omnium creaturarum efficere consti-
tuisset; ita eius commodis, dignitati, atq;
saluti consuluit; vt ei non modo statum ac
vitam cum ceteris animantibus com-
munem tribuerit; sed animum ex diuina mente delibatum, ce-
lestibus equalem inspirarit; sibiq; cum multis alijs rebus, tum
precipue regendi potestate similem effinxerit. Itaq; homo hu-
ius magnae Ciuitatis Dei ciuis constitutus est, vt recte ciuilem
societatem administrando, diuinam bonitatem ac providen-
tiam imitaretur, ad supremamq; felicitatem iucunde perue-
niret: quod vt facilius consequeretur, ei non modo bene viuen-
di; sed etiam recte administrandi rationem commonstrauit,
legibusq; in primis moderandam esse Remp. declarauit, cum

L

rerum

rerum vniuersitatem miro ordine formauit, aeternaq; lege distinxit. Sicuti enim diuinus ordo, sempiternaq; lex est ornamentum caelestium corporum, salus rerum natura constantium, Mundi deniq; vniuersi pulchritudo; ita mens & animus ciuitatis, decus, & lumen imperij in ordine & legibus positum est: ut sine ijs ciuitas bene constituta esse nulla possit: quemadmodum enim corpora nostra sine ordine inconcinna, & sine mente mortua existunt; ita ciuitas nullis temperata legibus, tamquam suo spiritu destituta, omnino deformis sit, suisq; partibus, & vita careat, necesse est. Propterea tum homini, tum in vnaquaque bene instituta Rep., leges omnino necessariae sunt: lege etenim prima est homini cum prepotenti Deo rationis societas atque similitudo; & legibus ciuitas primum coalescit, tum diu recte administratur, bonis denique omnibus cumulatur. Nam perbeata ciuitas omnium sapientum consensu, ea tum demum habenda est, in qua non singuli, aut pauci suo arbitratu & nutu imperant; sed tantum leges dominantur: cum tandem vrbes letae ac beatae floreat populis, abundant omnibus copijs, ciues maxima opum atque honorum affluentia inter se concorditer viuant, in summaq; tranquillitate conquiescant; quandiu leges imperant, & firmae ac ratae habentur. Quare, cum tantum momenti ad felicitatem consequendam; & ad rectam institutionem Reipub. in legibus positum sit; ut perinde felix aut infelix, tum quisque, tum ciuitas omnis euadat, ut bonis malisque legibus instituta est:

profecto cum disputatione de hominis

felicitate, & Reip. admini-

stratione, necessa-

rio con-

iun-

genda est legum cognitio atque

tractatio.

*
* *

DE LEGIBVS VNIVERSE; AC PRIMVM
Quid, & quotuplex sit lex. Cap. II.



EX generatim ac vniuerse, nihil aliud est, quam ordo a prudentia constitutus, qui rectam continet administrandi rationem, & legi subiectos cōsentaneis destinatis dirigit ad optimum finem.

Eius tria sunt genera, quorum vnum diuinam, alterum naturalem, postremum humanam legem complectitur.

Diuina, quæ lex summi boni & prouidentia Platoni dicitur, est sempiterna diuina prouidentie ratio, ceterarum omnium legum principium, atque exemplar.

Naturalis, seu mouens, eadem est cum lege caelesti, quæ factum a diuino Platone nuncupatur, earumque solum diuersa est ratio.

Humana vero, quæ naturalis prudentia appellatur, ex hominis prudentia proficiscitur, & diuinam ac naturæ legem iubendo vetandoque imitatur.

De lege diuina, atque æterna. Cap. III.



VM omnis humana lex ab æterna præpot. Dei lege, tamquam ex vberissimo fonte primum profecta, ad homines permanarit; alte legum humanarum, et a capite sunt nobis repetenda primordia, vt earum facilius explicetur natura; Itaq; instituendarum ciuiliū legum ab illa summa lege sumemus exordium, quæ ex omni æternitate orta est cum mente diuina.

Lex igitur sempiterna, est immutabilis omnium rerum a Deo constitutus ordo & moderatio, qua singula pro cuiusq; natura ad fines suos diriguntur.

Sed, vt ad hominem refertur, est humanarum actionū sum-

ma diuina sapientie honesta iubentis, contrariaque vetantis ratio, ob Dei gloriam hominumq; felicitatem ab ipsa Dei prouidentia ex aeterno tempore constituta, quæ præmia bene agentibus, suppliciaq; delinquentibus statuit:

Atque hæc diuina lex homini præcipue necessaria fuit, ut cum in primis ad caelestem beatitudinem natura facultatem exuperantem, ad quam homo natus singulariq; munere a Deo destinatus est, dirigeret: tum illi quid agendum, quidue cauendum ad supremam felicitatem consequendam sine ulla dubitatione constaret; nec modo eius actiones; sed latentes etiam cogitationes, quæ humana lege cohiberi non possunt, recta ratione ad virtutem informarentur.

Omnia tamen, quæ a præpot. Deo aeterno verbo cõdita sunt, siue ea necessaria, siue fortuita sint (exceptis ijs, quæ ad naturam diuinam spectant) sempiternæ legi subiecta sunt.

Sicuti enim Deus omnia, quæ in hac rerum pulchritudine cernuntur, ex nihilo admirabili sapientia condidit; ita eadem regit omnia, & rerum conditarum actiones, motiones, atq; impulsus, quod summi sapientis est, moderatur:

Verum dissimili ratione bruta animantia, & homo diuinæ legi subiiciuntur. Nam illa cæco naturæ impetu ab insito motionis principio agitantur, diuinæque prouidentia feruntur ad finem: hic vero, quia rationis est particeps, ductu rationis & cognitione, atque admonitu diuini iussus dirigitur ad summum bonum.

Huius enim æternæ legis perfectæ naturæ, quāuis nobis abditæ sit; soli que Deo ac beatis mentibus sit plene planeque perspecta; eius tamen vis, notio, & anticipatio quædam diuinitus cunctis hominibus insita est, nonnullis quidem maior & clarior; nonnullis vero minor & obscurior pro eius communicatione & lumine, quæ nos semper hortatur ad honesta, & auocat a peccatis & vitijs.

De lege naturæ.

Cap. IV.



QUAMVIS vniuersa, quæ extant in naturæ rerum, æterna lege gubernentur, ad suosq; fines pro cuiusq; rei natura ferantur; tamen soli homines concessu immortalis Dei, illius æternæ legis informatam notionem mente atq; ratione complectuntur, ut sibi met ipsis alijsq; possint consulere; ceteris vero animantibus rationis expertibus insitū est a natura se se mouendi principium, agendi patiendiq; facultas, & impetus quidam, quo ad id, quod adest se se accommodant, salutaria prosequuntur, fugiuntq; contraria, & ad suam perfectionē ducuntur; quem instinctum naturæ, ingeneratum nō modo mutis animantibus, sed homini quoq;, legē naturālē veteres appellarūt.

Est autem naturæ lex, vis atq; instinctus naturalibus rebus insitus a natura, qui suadet prosequenda esse bona sibi consentanea, fugiendaq; contraria, cunctaq; ad fines suos impellit.

Sed ea speciatim in homine, est liberum iudicium rerū agendarum ex innatis agendi principijs facile a ratione adhibita attentione collectum, quod recti amore & odio vitij nos trahit ad bene viuendum.

Hæc aut naturæ lex, non est proprie & per se habitus, id est constans cum oportet agendi perfectio: neq; enim est id, quo aliquid agit ratio; sed potius iudicium quodam rōne constitutum.

De præceptis legis naturæ.

Cap. V.



TAMETS I plura numerentur legis naturæ præcepta, quæ pertinent ad rationem occupatam in agendo: tria nihilominus sunt eorum præcipua genera, ex hoc summo naturæ præcepto profecta; id est, Bonum esse prosequendū, malumq; fugiendum, & ex innatis hominum propensionibus appetitionibusq; collecta,

L I B E R

collecta; ad quæ cetera omnia facile reuocari possunt.

Primum igitur homines natura impulsu, bonum sibi consentaneum expetunt, malumq; refugiunt; quod rebus omnibus atque naturis commune est; ex quo existunt hæc naturæ præcepta, omne animal simul atq; est ortum, se ipsum diligere, incolumenq; esse velle, se, vitam & corpus tueri, & a quacumq; vi defendere: omnia, quæ ad viuendum necessaria sunt, inquirere & parare, & alia huiusmodi.

Deinde est hominis speciatim quedam naturalis boni appetitio, qua conuenit cum ceteris animantibus, quibus id est a natura tributum & insitum, ut coniunctionis appetitus procreandi causa, sui salus, suoq; in genere per propagationem conseruatio, cura eorum, quæ procreata sunt, amor in filios, educatio liberorum, & id genus alia:

Postremo natura trahuntur homines ad boni naturæ rationis compotis accommodati cupiditatem & studium: unde huiusmodi naturæ præscripta effluerunt; mentem humanam immortalis Dei innatam quandam habere anticipationem, perpetua teneri discendi cupiditate, trahiq; ad veri inuestigationem atque scientiam, pietatem & cultum Deo esse exhibendum, natos esse homines ad civilem societatem, honeste viuendum, suum unicuique tribuendum esse, & quæ nobis fieri nolumus, alteri ne facere velimus.

D E L E G E H V M A N A, ac primum de eius necessitate. Cap. VI.



Si homo, ab immortalis Deo ad imaginem sui conditus, diuinisque muneribus auctus, eo in statu permanisset, in quo fuerat ab initio constitutus, & spreto diuino iussu in tot animi corporisque miseras sempiternasq; calamitates non incidisset; facile omnino insitas a Deo virtutes, naturæ probitatem, legem denique omnem diuini iuris atque naturæ, coluisset summa

ma factorum, consiliorumq; constantia; ac probe tenuisset innatam expetendarum, fugiendarumq; rerum scientiam, & natura duce optimum vitæ cursum conficere potuisset; nec sane esset, quod quisquam doctrinam, legumq; disciplinam requireret, cum satis adiumenti ad bene beatæq; viuendum habuisset perfecta ipsa natura.

Nunc, quoniam aliter accidit, & genus humanum lapsu primorum parentum valde vitiatum est; diuinam gratiam a primo ortu infusam amisimus, & rectæ voluntatis atq; rationis ordo & in Deū propensio deprauata est, qua pie, iusteq; vivebatur: tamen relicte sunt nobis primæ illæ notiones a natura ingenerate, vel potius diuinitus insite, quæ sunt veri ac falsi dydicandi, & boni ac mali iudicante conscientia discernendi rationes, virtutum & vitiorum atque actionum omnium origo; quarum ad præscriptum, si homo rationi consentaneas actiones, cogitationesq; suas, se denique totum formaret ac fingeret, & innata virtutum semina adolescere pateretur, rectam bene viuendi rationem commonstraret, & naturæ congruentem parerent illi felicitatem.

Sed, quoniam quæ nostris ingenijs inscuit natura virtutum semina, usque a teneris annis male consuetudinis corruptelis, prauisq; opinionibus ita obruimus, adeoq; statim in omni vitiorum prauitate versamur; ut neq; naturæ lumen, nec rectæ rationis splendor, nec ullum propemodum in nobis appareat humanitatis uestigium: ea de causa legum humanarum inuentio necessaria fuit, & potissimum ciuitatum moderatores ratione atq; virtute præstantes ex innatis illis notitijs leges deducere, iubereque oportuit; ut supplicij metu cogente a malo & vitijs abstineremus, & præmiorum spe, vitam naturæ atq; virtuti consentaneam duceremus.

Quid?

Quid sit lex humana, seu ciuilis. Cap. VII.

LEX humana, quæ ordo & anima Reip. dicitur, est recta subiectorum huius honestas actiones imperans, prohibensq; contrarias, & præmijs obtemperantibus, violatoribusque supplicijs constitutis, ad communem felicitatem dirigens, legislatoris prudentia cõdita insio.

Est autem lex recta ratio, vel recta cum ratione ordinis constitutio; quia, cum lex humanarum actionum mensura quedam & regula sit, cuius præscripto homines ad bene beateque viuendum ducuntur; ciuilis societatis retinenda causa nonnulla imperat, nonnulla vero prohibet; quod cum rationis sit proprium munus, lex quoq; maxime ad rationem pertineat necesse est.

DE CAUSSIS LEGVM CIVILIVM,
ac primum de materia. Cap. VIII.

SUBIECTA materia, in qua lex omnis humana versatur, sunt homines, aut potius humane actiones, quæ legum præscripto ad optimũ Reip. finem dirigenda sunt: hoc enim cuique legumlatori propositum est, ut iusta honestaque agenda imperet, prohibeatque contraria.

Verum, non ita intelligendum est, ut hominum actiones omnes legibus subiiciantur: neque enim artificum opera per se sub legis imperium cadunt; sed actiones illæ tantummodo, quæ in prauis optimisue moribus cernuntur, quibus homines probi, maliue fiunt, & laudem aut vituperationem merentur.

Atque huiusmodi quidem actiones ad tria capita commodè reuocari possunt; vel enim ad religionem & cultum immortalis Dei referuntur, ut illæ quibus diuinus cultus pie & rite non exhibetur, vel Christiana religio oppugnatur: uel ad cuiusq; uitæ rationem pertinent, cuiusmodi sunt illæ, quibus homines priuatim

natim turpem, obscenam & dissolutam vitam viuunt: vel denique civilem societatem spectant, veluti sunt illi, quibus iniuste cum ceteris agitur.

Hæ autem in moribus posita actiones, cum duorum sint generum, quædam internæ solo animo & cogitatione conceptæ: quædam externæ, non modo animo susceptæ, sed ipso etiam opere perfectæ, quæ civili societati plurimum prodesse aut obesse solent; hoc postremum duntaxat actionum genus propriè & per se legibus subijci perspicuum est.

Nam solæ cogitationes in civili hominum cœtu, nec pœna nec premio dignæ censentur, nisi insigne damnum eas consequatur, & in aliquem redundet, vel alicuius sint perspicuæ scelerum molitiones, & euidentibus signis patefacta consilia, ut conspirationes in Principem, patriæ proditioes, cogitata atq; incobata necis & calamitatum machinationes, & huiusmodi aliæ, quas, qui molitur, nisi obstaret impedimentum ad exitum, quo ad ipsum perduceret:

Quæ vero penitus occulta sunt, legibus non subijciuntur: horum enim, eum quædam soli iudici cognita sint atq; perspecta, ceteros autem lateant; quædam vero omnibus ignota sint; neutra humana lege puniuntur; sed a Deo tantum, cui omnia perspicua sunt, pœna, aut præmijs compensantur.

Legibus autem præscribuntur illæ tantum externæ actiones, quæ plerunque, & facile euenire solent: ceteræ vero, quæ raro contingunt, quoniam similitudine aliqua, aut æquitate facile a iudice decerni possunt, a legislatore negliguntur; quibusdam tamen exceptis, quæ speciatim prohibentur ob summam iacturam maximumq; detrimentum, quod civili societati essent allatura, ut in Remp. coniurationes, patriæ proditioes, parricidia, & si quæ sunt eiusmodi aliæ.

Quapropter ea, in quibus tamquã in subiecta materia civiles leges versantur, sunt oës actiones externæ in moribus posita, quæ libere a subiectis populis, qui sunt consilij participes, contra singulorum & Reip. salutem ac utilitatem suscipiuntur.

Neque enim ratione vel usu rationis expertia, legibus ullis tenentur; cuiusmodi sunt bruta animantia, dementes homines, pueri & furiosi, qui neque consilij, nec mentis compotes sunt.

Legem ciuilem omnia vitia prohibere non posse. Cap. IX.



QVONIAM populi maior pars, & ciuium plerique, quibus lex iniungitur, exiguo ingenio, vel certe imperfecta uirtute pradi sunt, & malis moribus deprauatisq; opinionibus imbuti, in omni fere semper prauitate versantur: propterea legis non est omnia vitia prohibere, quibus tantum viri probi vacant nullo legum metu; sed grauiora duntaxat, a quibus quamplurimi abstinere facile possint: atque ea in primis, que ceteris sunt detrimento, & humane vite societatem e medio tollere videntur:

Cetera vero leuiora, quibus non nimis offendimur, plebi vitij procliui ignoscenda sunt.

Quemadmodum vero lex ciuilis, vniuersa vitiorum genera non prohibet; ita etiam nec actiones omnibus virtutibus consentaneas imperat; sed eas precipue, que statim, vel aliarum interiectione ad commune bonum diriguntur.

De forma legum ciuiliu. Cap. X.



FORMA legis, est recta gubernandi agendiq; ratio, vel ciuilis ordo rectam imperans agendi rationem: quemadmodum enim grauium, leuium, & neutrorum corporum ordo & constitutio, ob sui prestantiam & diuinitatem quandam, est forma legis nature & rerum vniuersitatis conformatio; ita ciuitatis ordo, & recta humanarum actionum ratio, forma atque ipsa natura ciuiliu legum censenda est.

Hac autem recta agendi ratio orium & originem ducit ab humana.

*humana prudentia, quæ recta cum ratione quid bonum malum-
ve sit homini diiudicat, quidve prosequendum aut fugiendum
ostendit: proxime vero & proprie ab ipsa lege existit, qua sta-
tim actiones nostræ perficiuntur.*

Cuiusmodi debeat esse humana lex. Cap. XI.



*PRIMA præcipue legi civili necessaria sunt, si legis
nomen ac vim re, non verbo tantum obtinere
debet, primum igitur religioni atque diuino cul-
tui eâ congruere necesse est, ut diuinæ legi, a qua
primum emanauit, similis sit: deinde disciplina
conuenire, ut naturæ legem præ se ferat: postremo salutem pro-
spicere, ut communem spectet hominum utilitatem.*

*Atque hæc sunt, quæ maxime necessaria censentur ad opti-
mas salutareshq; leges condendas; quibus si careat lex, in bene
constituta Rep. non modo vim ullam obtinere non potest; sed ne
legis quidem nomine digna est.*

*Ceterum lex perspicua esse debet, & populari dicendi gene-
re ad vulgi intelligentiam accommodato conscripta; nullisque
ambiguis sententijs perplexa, ne animus iudicis a vero ab-
ducatur.*

Legem vniuersæ ferendam esse. Cap. XII.



*LEGES, ut omni tempore, in omniq; rerum &
hominum conditione civili societati multum ad-
iumenti afferre possint, nullo modo ad præsentem
rerum & temporum statum definiendæ & coar-
ctandæ sunt; sed quamplurimos alios multaque
negotia ac temporum vicissitudinem prospicere debent: quod
fiet si non anguste, sed vniuersæ ac generatim ferantur.*

*Communis enim ciuium utilitas, quo honesta lex omnis re-
fertur, ad quamplurimos spectat, & ciuitas ex multis homi-*

nibus constituitur, nec una aut paucis actionibus felicitas comparatur, nec una dies aut breue tempus hominem beatum efficit; sed virtutis habitu comparato, pluribus in omni etate & vita perfecta probis actionibus, homines ad tantum bonum perueniunt: Resp. vero non ad exigui temporis spacium sed ad diuturnitatem instituitur, ciuiumq; propagatione multa secula conseruatur.

De legum ciuilium fine, officio, & instrumentis.

Cap. XIII.

LEGVM ciuilium finis, vniuerse duorum est generum, si enim spectetur id, cui lex affert adiumentum, sunt homines, qui in ciuili societate viuunt, Reges, Principes, atque Resp.: si vero intelligamus id, cuius causa condenda, & quo referenda sunt leges vniuerse, duplex exoritur finis, alter summus, qui Deus est, tamquam supremum bonum ciuitatum ac singulorum, & diuinus cultus, religionisque conseruatio: alter proprius ciuilium legum, & ad beatam uitam perducens, qui est ciues in genere morum simpliciter bonos efficere, seu commune bonum atque felicitas Reip., incolumitas populorum, singulorumque perfectio.

Legis officium, est ea proponere et iubere, quibus ciuiles hominum actiones ad virtutem, & ad optimum Reip. finem accommodate diriguntur; quod lex praeclare praestat iusta & honesta imperando, prohibendo contraria, leniora permittendo, delictaque puniendo.

Legum vero instrumenta & ministra, sunt poena & praemium, quibus qui nec virtutis studio, nec odio vitij ducuntur, nec omnino ratione mouentur; vel supplicij metu deteriti, a peccatis & vitijs auocantur, vel propositi praemij spe illecti, ad bene iusteque viuendum impelluntur.

De muneribus legum ciuiliū. Cap. XIV.



QUATTUOR sunt munera legum ciuiliū, quę scripto sanciunt quod volunt, iubere, vetare, permittere, & punire.

Actiōes enim humane, quas lex ad virtutem apte instituere, & quibus ciues probos efficere debet, vel probe sunt, vel prauę, vel quodammodo neutra, iubet si per se & in genere morum bonę sunt, & virtutibus congruentes; quoniam lex est pręscriptum rationis modo quodam imperandi: si vero prauę existunt, & virtuti perfectę dissentaneę, uetat, punitq; illos, qui eas suscipere conantur; nam, cum rationis proprium sit, ut ab uno ad aliud progrediatur, sicuti conclusioni principiorum vi & euidentia, assentiatur necesse est; ita supplicij metu populi a malis abstinere coguntur: quod si actiōes promiscuę sint, ut quę aliquantum boni sunt, & mali participes, permittit, humaneq; ignoscit imperfectioni; leniora enim mala sunt, & parum detrimenti afferunt ciuili societati.

Consulere vero, & premijs afficere, cum priuatis etiā ciuib; conueniat, non sunt legum propria munera.

De causis efficientibus, & effectibus legum ciuiliū. Cap. XV.



DE *VOBIS* primum, tamquam principijs humane leges constituuntur, ordine & auctoritate, hac a principe manat, qui legem subiectis populis sibi ab immortali Deo, a natura que in homines imperito, ciuiumq; consensu confirmato imperio, iniungit: ille vero a prępotentis Dei, Naturę, & Hominis prouidentia exoritur.

Deus enim cuncta, quę Mundi ambitu continentur, summa

ma sapientia miroq; ordine distinxit, & sempiterna lege perpetuo moderatur; quæ postea fuit ceterarum omnium legum exemplar, origo, & moderatrix. Ex quo uniuersi legumlatores alicui Deo leges acceptas retulerunt, ut Trismegistus Mercurio, Charondas Saturno, Minos & Rhadamantus Ioui, Licurgus & Draco Minervæ, Moyses & Petrus vere uno trinoque DEO:

Natura vero, naturalium rerum insignem ordinem ac leges, quas Deus cunctis operibus suis impressit, veluti speculum atque exemplum ferendarum ciuiliū legum homini ob oculos ponit, eique ad leges condendas, ad prouidendum, iubendumq; maximam elargitur facultatem:

Homo ad extremum & legislator prudentiæ & rectæ rationis vi, iubendique potestate, est proximus conditor legum ciuiliū: est enim lex rectæ rationis sapientis animo intus latentis scripto expressa imago.

Effectus autem proprius atque precipuus legum ciuiliū, est ciues, quibus ipsæ imponuntur, viros simpliciter bonos, & legibus obediētes efficere: lex enim, cum sit præscriptum rectæ rationis ob communem ciuium felicitatem a Principe constitutum, optimis moribus & consuetudine, qua virtus comparatur, subiectos populos ad virtutem perducit, quæ tunc in eis cernitur,

cum principi
atque
gubernatori recte subiiciuntur & legibus parent.

∴

Quis possit legem condere, & quæ legislatori necessaria sint. Cap. XVI.



RITA sunt legumlatoribus maxime necessaria, ut leges Reip. salutare iure sancire possint, publica potestas seu imperium, sapientia, & vite ac morum integritas.

Nam cum hominum actiones dirigere ad communem felicitatem, non sit privatorum hominum munus; sed vel totius populi, vel eius certe, qui imperio præst: propterea populus duntaxat uniuersus & Princeps, aut qui eius personam sustinet, iure obtinet legum ferendarum auctoritatem.

Adsit enim vis cogendi coercendique eos, qui leges violarint necesse est; quam privati homines nec habent, nec exerceant æquum est.

Nisi vero legislatoris sapientia, & recta ratione, sed temeritate atque libidine lex condita sit, tantum abest, ut vim & auctoritatem obtineat, cum diuina & natura legi aduersetur; ut ne legis quidem nomine appellanda sit.

Quod si ab improbo legislatore iustæ leges ferantur, apud imperitam & morosam multitudinem, vite ac morum legislatoris deprauatio adimit, aut certe minuit legi vim & auctoritatem; cum eius ad exemplum, qui alios instituere profitetur, potius, quam ad legis præscriptum subiecti populi plerunque formentur, ac dirigantur.

De legum promulgatione. Cap. XVII.



QUONIAM lex constituitur tamquam regula, & mensura rerum agendarum; tum eam civili societati imponi censendum est, cum iniungitur, & quasi applicatur subiectis populis: hoc autem promulgatione maxime efficitur. Ita enim fit, ut lex ad omnium, qui
ad sunt,

adsunt, quive absunt notitiam perueniat: deinde scripto edito, vel quasi per manus, maiorum sermonibus ad aliorum etiam aures & omnem posteritatem permanare possit; quare nisi lex promulgata sit, nullam coercendi vim habet.

DE LEGVM CIVILIVM VI, AC POTESTATE,

Leges humanas conscientiae crimini earum violatores obligare. Cap. XVIII.



IMANAE leges, si aequabili iure constitutae sint, singulos Reip. ditioni subiectos, qui eas violare, aut corrumpere audent, non solum debita poena in eos constituta mulctare possunt; verum etiam in ijs, quae ad recte praeque factorum conscientiam pertinent, reos culpa queunt efficere.

Est enim honesta lex omnis, & recta suadente ratione condita, propago quaedam ex sempiterna lege decerpta; quae, quoniam diuina legi consentanea imperat, aut prohibet; participatam etiam illius vim obtinere debet.

Quare, cum ab immortalis & prepot. Deo omnis imperandi potestas profecta, & diuino munere Principibus concessa sit, qui sacrosanctas Principum leges violat, admirabilem Dei ordinem, nexumque rerum pervertere, ac diuina voluntati repugnare conatur: ex quo infensus Deo redditur, quamuis iustam iudiciorum & legum poenam effugiat.

DE LEGVM INTERPRETATIONE, SEV

de æquitate. Cap. XIX.



QUONIAM legumlatores vniuerse tantum leges ferre solent, nec omnino factum definiunt, & sepe incidunt tempora, quibus necessario a lege discedendum est, si pacatos populos, firmumque Reip. statum esse velimus; propterea opus est alio iure non scripto prae-

prætermisso a legis conditore, quo seueritatem legis mitiget index, & legislatoris sententiam interpretetur; hoc autem est æquitas, qua iuste aut iniuste facta bono & æquo ponderantur, quod Greci ἐκωνὴς vocant.

Igitur legi coniuncta esse debet æquitas, quæ nihil aliud est, quam benignior scriptæ legis interpretatio, quæ ex recta rationis iudicio seueritatem acerbiorẽ mitigat, & prudenter pro rerum, temporum, loci, hominumque ratione, communi utilitate moderatur.

Quare æquo & bono, quod est iuris legitimi, & generalis comprehensio sine exceptione moderatio, factum venia dignum, per imprudentiam & fortuito commissum iudici perpendendum est, non ex lege iudicandum, nec legis verba, sed legislatoris mens & sententia spectanda.

Cum enim omnes leges ciuiles ad salutem & commodum ciuitatis referendæ sint, eas ex communi ciuium utilitate, non autem scriptione interpretari oportet; quod etiam ipse legislator si adesset, proculdubio admoneret; quoniam summum ius, sæpe summa iniuria existit.

Verum, nisi temporis ratio, & præsens necessitas urgeat, seu res ambigua sit, nemini priuato fas est sibi præripere facultatem interpretandi quid sit ciuitati emolumento; sed consulendus est Princeps, cuius priuilegio integrum sit ei a lege discedere.

Quod si adeo vis salutis immincat, ut ante maximi cruciatus perferendi, & summa calamitates subeunda sint, quam potestas repetenda; annexam habet & quodammodo tacite dat ipsa lex potestatem discedendi a legis præscripto: uis enim atque necessitas soluta est omni lege.

De legum ciuiliū abrogatione, & mutatione.

Cap. XX.



A M E T S I lex omnis suapte natura immutabilis sit atque aterna, & quæ varia sunt, vel ad quoddam tempus scriptæ leges; populariter magis, quam vere legis nomine appellentur; tamen, cum lex rationis quædam sit norma, qua hominum dissimiles actiones diriguntur, tum ob rationis, tum ob actionum humanarum variam, mutabilemque naturam, etiam si iusta sit, pro loco, tempore, hominumque ingenijs, interdum iure commutari potest.

Ita enim natura comparatum est, ut quemadmodum artes, atque scientiæ humano ingenio inuenta ab humilioribus orta principijs, progressionibusque usæ & aucta, paulatim perficiantur: nihil enim simul ortum atque inuentum, statim perfectum est; ita rationis splendor, & vis quotidie augeatur, & virtus, cognitioque præsertim atque prudentia, temporis diuturnitate & longo rerum usu adolescat, confirmetur, atque absoluitur.

Cum autem varia sit vnoquoque tempore ciuium & rerum conditio, dispares mores, & dissimiles hominum status; varia quoque & diuersa singulis ætatibus congruere & expedire perspicuum est.

Quare principia quidem legis immutabilia sunt, quæ vero ex principijs colliguntur, ob rationis, legisque ciuilis imperfectionem, rerum, ac temporum vicissitudinem, humanarumque actionum inconstantiam, sæpe numero variantur: unde legum etiam mutatio necessaria est.

At vero non semper abroganda lex est, quotiescunque melius quidquam occurrit; quoniam legis abrogatio suapte natura communi utilitati est detrimento: nam, quæ duo ad legum custodiam

modiam & observationem summum adferunt adiumentum, consuetudo & cogendi vis; ea legis abrogatione tolluntur.

Propterea, nisi tantundem commodi compensetur civili societati, quantum mali confertur, & maximum ac perspicuum emolumentum ex noua lege ad ciues redundet, vel nisi lex prior claram contineat inequalitatem ac detrimentum; nulla ratione lex vetus abolenda est.

De consuetudinis vi, & auctoritate :
Consuetudinem vim legis obtinere posse.
Cap. XXI.



NON modo legislator, sed etiam diuturna populorum consuetudo scriptas leges confirmare, interpretari, abolere, & ius nouum inducere potest, quod vim legis obtineat.

Habet enim ipsa consuetudo legislatoris mentem, & voluntatem explicandi facultatem; quoniam, quemadmodum animi sensa oratione rationis interprete, patefiunt; ita ratio legislatoris atque voluntas, ex quibus leges proficiuntur, factis, crebrisque actionibus consulto susceptis exprimitur.

Est autem civilis consuetudo, ius non scriptum, aequitatem & legis vim continens, diuturnis moribus populi & recta ratione in ciuitate inuectum.

Ad hanc consuetudinem inducendam quattuor precipue necessaria sunt, primum, ut rationi consentanea sit; secus enim corruptela potius, quam consuetudo censenda est: deinde, ut prescripta sit, id est temporis diuturnitate, & ut communiter decennio inueterata: postea, ut frequenti usu, & actionum crebritate confirmata sit, ex quibus tacitus populi consensus, & approbatio colligi possit, & saltē bis ex ea aliquid actum, indi-

catumve sit: postremo, ut maior populi pars huiusmodi consuetudine usa sit, vel ex ea agendo, vel tacito consensu approbando; quorum si alterum desit, consuetudo vim legis amittit.

Ceterum in vnoquoque populo non eadem est consuetudinis ratio: nam si populus, cui lex iniungitur, liber solutusque sit; mos veteri consuetudine receptus, legibus antestat; plus enim momenti, ac ponderis situm est in consuetudine liberi populi, qui legem ferre, & latam abrogare ac interpretari potest; quam in Principis & legislatoris auctoritate, cum a libero populo, tamquam ex fonte omnis derinetur Principis imperandi potestas:

Si vero populus legem ferre, & interpretari nequeat, nec scripta lex ciuium coniunctionem dirimat, aut afferat insigne detrimentum; consuetudo legem non abrogat, sed lex consuetudinem superat.

De solutione a legibus, quæ vulgo dispensatio
dicitur. Cap. XXII.



QUONIAM *multæ in vita mutationes existunt, fierique potest, ut præceptum, quod populorum communitati accommodatum est, alicui priuatim quibusdam in rebus, locis, atque temporibus congruere nequeat; propterea ciuilis societatis retinendæ causa, necessaria fuit legibus exolutio, seu a lege discedendi facultas.*

Quæ nihil aliud est, quam communis vtilitatis studio, alicui priuatim ex iusta causa, a principe concessa iuris communis relaxatio.

Nam ad Principem tantum, vel totius Reip. moderatorem pertinet iubere qua ratione vnumquodque commune præceptum a singulis seruandum sit: qui enim populum regendi potestatem habet; potest etiam iure communi & lege suæ auctoritati innixa quosdā exoluere, qui suæ ditioni subiecti sunt.

Verum,

Verum, non suo arbitratu tantum, & libidine; sed in primis ratione & causa cognitione, communique utilitate ductus, potestatem alicui faciat, qua legis vinculis relaxetur.

De legibus iniustis. Cap. XXIII.



NIVSTAE leges, vel potius legum eversiones, sunt perniciofa iussa rerum agendarum absq; recta ratione & contra diuinum humanumq; bonum in populos a Principe quaestus vel libidinis causa constituta.

Dupliciter autem iniquae leges fieri possunt, vel quia aeterna legi omnino contrariae sunt; ut, quae populis a Tyrannis de falsis alienigenarum Dijs, adorandis leges imponuntur, quae nullo modo seruandae sunt: vel quoniam ab humano bono longissime absunt, commodisq; ciuitatis officiunt.

Quod tripliciter potest contingere, primum ex fine, cum leges salutem atque utilitatem Reip. tamquam finem propositum non habent, nec legumlatores communis utilitatis causa; sed libidine lucrique cupiditate ad leges condendas impelluntur; deinde ex auctore & legislatore, si qui legum ferendarum vi ac potestate caret, legem ferat; vel qui obtinet facultatem, ea inbeat, quae maxime eius auctoritatem exuperent: postremo ex legum forma, nisi aequabiliter omnibus legislator eas imponat; sed odio, vel amore, gratiaue impulsus, ciues inaequali iure metiatur.

Quemadmodum igitur praecepta & instituta ciuitatum, quibus homines utiliter ac salutariter viuunt in civili communione, uere leges appellantur; ita quae perniciofa ad turpiter, iniusteque uiuendum populis iussa describuntur, potius legum corruptela, & ciuitatum pestes atq; interitus, quam leges nominandae sunt; cum a diuina lege, et iure naturae defectiones quaedam sint.

Quare,

Quare, si quæ huiusmodi leges interdum nuncupantur, populariter magis, quam re nomen & uim legis obtinent; non enim hominum conscientiam obligare possunt, nec ciues ijs parere debent, nisi ex hoc plus mali ac detrimenti, quam boni consequeretur; ut si hoc plurimis esset offensionem, pareretq; in ciuitate concitationem: quorum euitandorum causa, præstat viro prudenti de suo quasi iure aliquantum concedere, quamuis diuina legis auxilio nitatur.


F I N I S.

Menda præcipua corrigenda.

Pag. 2. b. ver. 9. ac dicendum. 3. b. 29. degunt. 33. illi beatiore. 12. b. 4. disciplina. 17. 4. profuenda. 23. 19. obeunda. 29. 18. Tyranni. 23. vi imperij. 47. a. 12. nam sicuti ratio, cuius proprium est ab vno ad aliud progredi, conclusioni. cetera leuiora omittimus.



39055



BIBLIOTHECA
SERIES
PUBLISHED